

# SOOKOHA NI SOWAAKHULA

## MWAHA WA EROHO YOWARYA



Nuvira nsana ohiyu othene ahu niri oosareya. Kihiiwa moolumo ooreera olelo a atthu anci-ene yaakhenle Eroho Yowarya. Nto nootteeliwa murima mwaha wa yeeyo.

<sup>2</sup> Nootteeliwa murima okhala ni Munna Graham ni hiyo ohiy'ula, mmosa w'axirikh'ahu va a otapernakulu, pastore a ekereja yoowaarya wu Utica. Ni Munna Jackson, owo aari vaava, nsana ohiyu, kookupali wira aahikhala, ahiiso owo ori ottuli nno voowiryanani vano, ookhala iirale, mu . . . Ayo, kinnimoona Munna Jackson ottuli voowiriyana vano. Ni—ni Munna Ruddell, owo ori vaava ohiy'ula? Owo ti mmosa w'axirikh'ahu nno o "62." Ninnitthapela okhala ni yaawo. Nave ni awihu. . . Oh, Munna Pat, ni axinna othene ala akina, hiyo nri— ari voowiryanani. Hiyo ninnitthapa okhala ni nyuwo othene va ohiy'ula.

<sup>3</sup> Vano, vaakhanle wira kaamuhimya sana etthu ene, kaanwiihana amosa-amosa w'alaleyi ale ooratta osulu nno wira yoolaleeryeni, okhala wira miyo wookilala vammilo mwaha w'okathi ule wooreera naarin'ahu nsana ohiyu.

<sup>4</sup> Vano, amwaar'aka, awo t'akhanle anikilakiherya; moosuwela, axinna, etthu enihim'aka. Awo yiirale atthu yaari ottuli nsana ohiyu khiyaawerya okiiwa, okhala wira kaalavula mw'etthu ila. Nto vano, kihinatthi opacerya, kinrowa weeherya etthu emosa. Vano, nkisuwenle sinto ti yooreera. Enniweya oratteene ottuli wu? Wala ela ti yooreerexa? Ela ti yooreerexa? Vano, Oophentiwa, ekwah'ela kihooxinttani. Vano, eniiriwa ela ti yooreera. Vaareera. Oh, wulu! Owo muthiyana. Owo t'oreera, okhala wira woovira okathi munci-ene okhuma waarin'aka mmosa. Imaara sinci-ene owo t'okhalana exariya.

<sup>5</sup> Ahe, vekeekhai naaniviriha okathi wooreera mwa miteko iye sookokhorela miraru s'ohiyu; Miyo kaahiviriha. Nto vano, ifiita, sothene ohiya nsana ohiyu. . . kaahimwiihana Munna Goad khimuleela wira arwe akuxe efiita ya otapernakulu. Masi khwiiraneya osuwela wira Billy Paul aahikuxa ekaaro awe khurowa, vano efiita khiyaakuxiwe ntoko sinsuwel'aka. Tivo khanirina eyo. Kaatthuna wira kipwehe mukereja mwaha wa ekereja wira—mutthu iira—ele enaamini ahu.

<sup>6</sup> Vano, ohiy'ula kinrowa olavula mwaha wa *Muthukumano Muulupale*, kawerya vale omaliha sookoha muhina m'okathi. Vano nto, meelo voosiisu muteko wa ovoniha. Ni ninrowa waavekelela aretta. Tivo, khanikhanle ovahaka—wala orowa paahi ni wira, "Vano, kinrowa wookuxani nyuwo, ni nyuwo,

ni nyuwo.” Eyo khayaarowa okhala yooreera. Masi hiyo ninookawa nikuttha na ittikitti, nto nipuro nlo mwa ittikitti seiyo, kinimwiihana ittikitti vakhani vaplataforma. Vano nto, Eroho Yowarya yapacerya vale wuupulula, vano Eyo enoovira voowiriyani ni waakuxa atthu voowiriyani wira okhale muteko w’ovoniha. Vano nto, meelo voosiisu, kinookhala kilavulaka, Apwiya yatthuna vale, okathi vakhani ohinatthi muteko wo ovoniha.

<sup>7</sup> Kinniwoona amwaar’aka etheyaka. Oophentiwa, khamunwerya okiwa hata vakhani? Oh, munnikiwa. Ahe, ti yooreera. Awo ankilaathi ottuli wu ni vakhala wira—yaahiwerye okiwa, awo anttikinya muru, “Nyuwo... Nkinwerya owiiwani, nkinwerya owiiwani.”

<sup>8</sup> Tivo nto meelo—meelo ohiyu onrowa okhala muteko w’olaleerya ni muteko w’opatiiso. Vano nto, kimalihakaru olaleya meelo ohiyu, ninookhunla ikurtiina nikhalane opatiiso wa mmaasini va meelo ohiyu. Apwiya yatthuna vale, Apwiya yatthuna vale, voosiisu kintthuna—ahiiso meelo ohiyu kintthuna kilavule mwaha wa: *E—Ethoonyeryo Ehooniheriwa*. Nto numala, nakhala vaava Namararu ohiyu, Apwiya yakitthuniherya okhala vaava Namararu ohiyu, kintthuna kilavule mwaha ya: *Nrimoona Ettheneeri Awe Onikhuma nsuwa vano Nrweenle Omukokhorela*. Vano, eyo enrowa okhala nihinatthi waattamela niira na Natale.

<sup>9</sup> Vano nto, naanaanoru nuvira Natale enrwa esumana ya wiitthyuuwa ya Natale. Ti vaavo vankux’ahu iwarakha sothene... Munna Mercier n’akina kweekwe annikuxa. Vano hiyo ninookuxa sothene, khuvekelela iwarakha iya ni waavekela Apwiya wira enihoolele khula nipuro mulaponi onrow’ahu orowa-wo.

<sup>10</sup> Vano, awo ti, Alipa a Nakoso aKristu, aakhalana muhelelo muulupale, wira kakhale oFlorida mwaha wa muthukumano aya. Okhuma iwo orowa oKingston, numala orowa oHaiti, nto mpakha oPuerto Rico, Okuusini wa wAmerika, ohokolowa niviraka oMexico.

<sup>11</sup> Masi enkhalana ntoko Apwiya anikeettiherya oNoruweeka. Nkisuwenle mwaha wa xeni. Nyuwo munnisuwela eliivuru yaamukhaani eiianiwa *Mutthu Oveleelihiwe Okhuma wa Muluku?* Eyo ti esuweliheryo yuulupalexa ya etiini oNoruweeka. Nkuupuwelani, etthu Apwiya yiiraly’aya iwe. Nto okathi kaary’aka weiwo, nkaatthuniherya owiixaatherya matata aretta. Kaahikhala weiwo mahiku mararu ohiyu. Nto nkaatthuniherya owiixaatherya matata aretta. Tivo munnoona etthu Muluku okhanly’awe wiiraka. Mittitthi s’atthu saari suulupale yaarin’aya waakuxa mapiliisa khwaakhaliha, ikhavalu, ni owoomola atthu mphironi wira kiwerye ophiya nipuro nle. Ni nkaawixaathenrye matata aretta. Nnakhalu vo

miyo kaahaavekelela; khwaahiya wiixaatheryana matata mmosa ni mukhw'awe.

<sup>12</sup> Tivo...[Ookhala onlavula ni Munna Branham—Mol.] Ayo, vekeekhai kinimwiira, nto. Vano, meelo voosiisu... Vano, ohiy'ula, khino ninookelela sookoha iya, okhala wira nookhalana kamosa-kamosa sooreera. Ni nkisuwenle okathi xeeni Apwiya anrow'aya onikhaliha mwa seiyo. Nto numala, meelo voosiisu Billy Paul, Gene, wala Leo, mmosa, onookhala vaava wira akawe ittikitti sa mavekelo ewoora ya neethanu na tthaaru mpakha ya neethanu na tthaaru ni minuutu miloko miraru. Vano, athu ale anikhuma ota wa muttethe, mukihye kiwuupuxeryeni wira muhiliyale. Mwaatthunaka orwa muliinyani, naamutthuna nikhale n'athu anikhuma ota wa muttethe vaweryaneya vale.

<sup>13</sup> Vano, imaara sikina va mukereja ninniphiyerya nipuro eniriw'aya, "Ahe..." Naakuxe athu ankhuma ota wa muttethe, eruhiwe... Mutthu onimwiira, "Ahe, nkisuwenle etthu yaavonyeie n'awo. Pooti okhala ehimyaka etthu evonyeie." Vano mwaakuxa athu a mmuttettheni; eniriwa, "Oh, siiso mwaasuwenle-ene." Tivo...nto eniriwa—enihimmwaka wira, "Ahe, kinimooleelani, iyo ittikitti sa mavekelo." Ahe, ankhi ale ahirina ittikitti sa mavekelo. Annivira mahiku ni mahiku okathi e... .

Muhimye exeeni? [Munna Branham onvekeliwa weemela orakamela mikorofoni—Mol.] Keemele kirakamele miikoro? Ahe, moosuwela, miyo kweekwe kinlaleyaka eriyari y'ephiro. Vano khino kinookuxa siiso. Yooreera? Ti yooreera. Ti yooreera. Kinimooleelani exeeni iyo. E—enamun'ahu y'ovahana mihupi y'anamunci-ene ti yoohireera, yoohireerexa. Ni kxanimphavela okhalana hata yooreera naanaano va, okhala wira nintthuna wira etapernakulu esya etekiwe naanaanoru. Vano nto ninoorowa okhalana opuro munci-ene (munnoona?), nawerya-ru ovara muteko va ni wuncererya nipuro nla vakhani, n'ukhalana opuro wowaatta, ni olikana wira nikhallane mithukumano naakhalanaka va.

<sup>14</sup> Nto vano, muupuwele, voosiisu amiravo, mmosa wala araru a yaawo anrowa okhala ekawaka ittikitti ekhatiri ya iwoora thanu na tthaaru ni minuutu miloko miraru, wala, thanu na tthaaru ni thanu na tthaaru ni minuutu miloko miraru. Eyo ennivaha okathi wira athu othene elokiherye sothene. Nto miyo kaalavula moota awo ankawas'aya ittikitti, xeeni eniirel'ahu. Eri wira okhaleke wunlaanyeya. Munnona? Vano, ankhi kaarwiiye va, ntoko naanaano va khwira, "Mmuhiye muthiyan'ola, muthiyan'ola, ni mulopwan'ole, ni muthiyan'ola...?" Moone, eyo yaamukhala—eyo yaamukhala yoolipa. Munnona? Vano nto, nyuwo mwa... .Imaara sinci-ene kihiiwa yeela. Nto yaahikhale anci-enexa voosiisu, pooti wira etthu yeeyo. Kinimwiira, "Athu

akavi va anikhuma ota wa muttethe murina etthu evonyeie ni nyuwo, nvenye.”

<sup>15</sup> Munna Mercier, munoorwa okihuluxa. Munoorowa okikhaliherya? [Munna Mercier onnaakhula—Mol.] Oh, munrweela...Owo onrweela ohuluxiwa wawe. Koolavula ni mposi anyu olelo. Vano, vanreera mukhale ookireerela murima saana. Munnona? Vaareera. Ti yooreera. Miyo—miyo kinnixankela ominyala iwo Munna Leo. Yaahikhale saana, nrowe—nrowe nilokiherye ntoko sinsuwel’ahu moota woolokiha, vooreerexa sinwery’ahu.

<sup>16</sup> Tivo vano nto, mwaavekele atthu anikhuma ota wa muttethe wira evenze matata ale arina mukattiyamiho. Vano nto yeemele vaavo paahi, omuthukumanela mutthu mmosa mpakha Eroho Yowarya opacerya ovara muteko, ni okuxa voowiriyani vothene. Akavi yaari vaava okathi woonaly’aya wiiraneya vaava? Ekeekhai! Munnona, munnona? Tivo khiva mulattu enamuna xeeni ery’aya. Eyo paahi. . .

<sup>17</sup> Kintthuna wira muupuwele ela, nto kinoophavela otthikela-tho yeela voosiisu. Amalapo, Ehapari yooreera avahiwaaya ti Ehapari yooreera ya waamini, kahi ya miteko. Munnona? Ni ntoko sihimmy’aka nsana ohiyu. Okathi ekhuruwaly’aya Eroho Yowarya oPentekositeni, okathi yaaroweliw’aya aYuta (Miteko 19:5), awo yaahaana owiixaatherya matata wira yaakhele Yeeyo. Vano okathi arowaly’aya w’Asamariya, yaahaana owiixaatherya matata. Masi varuuly’aya w’Amalapo owannyawe Kornelio, “Petru nlelo alavulaka moolumo ala. . .” Kahi wiixaatherya matata.

<sup>18</sup> Okathi vaakhwiw’awe mwali, mwaana a Yairu, namukuttho, khwira, “Murwe mmwiixaatherye matata, onookhala mukumi.” Masi okathi mukhulupale a anakhotto muRooma, Mmalapo, iiraly’awe, “Nkimphwanela wira Nyuwo mukele mpa mwaka, mulavule nsu.” Ti yeeyo. Munnona?

<sup>19</sup> Muthiyana a oSirofeniisiya, Mukreku ti yeeyo owo aary’awe, okathi owo—okathi Yesu omwiirenly’awe, khwira, “Khivanreerela Miyo owaakha anamwane yoolya khwaavaha alapwa.”

Owo iirale, “Eyo ekeekhai, Pwiya; masi alapwa annoolya vathi va meesa itathela s’anamwane.”

Owo khwira, “Mwaha wa nuulumo nla, xetwani oomukhuma mwan’inyu.” Vano muhimyeke itthu sooreera. Muhimyeke etthu yooreera ya mutthu. Muhimyeke sa Yesu. Muhimyeke etthu yoororomeleya, etthu y’ekeekhai. Eyo ti enamuna yo wiikuluxa axetwani. Owo khonahimyeke wira—Owo khaanvekelenle mwali uwo. Owo khaahimye etthu ya owo ovonihwiwa; Owo iirale paahi, “Mwaha wa nuulumo nla, mwaha wa nuulumo nla. . .”

<sup>20</sup> Hattie Wright, nihiku nlo, owo khaavekela etthu. Owo aarookilaathi vale paahi, masi aahimye etthu yooloka, yeeyo

yaasivelinhe Eroho Yowarya. Vano Eroho Yowarya khulavula yiiraka, “Hattie, nvekele etthu p’itthu muntthun’anyu, etthu p’itthu murin’anyu ni muntthun’anyu. Musuwele ela yaakhanlene y’ekeekhai wala nnari. Nvekele etthu p’itthu (ovonihwa wa munn’awe mwaamukhaani aarakanle aaphwanyaneya vale oohina muteko; itoolare ikonto muloko wira ahirowe othipa mmyaakoni mme iwe; ottikiheriwa omwali erutthu awe yoomalamala); etthu p’itthu entthun’anyu ovekela, nvekeleke naanaano va. Eyo yaahirwe-ru woovahani naanaano va, weso ka profeta oowootha.” Eyo—eyo eyo etthu, kehiyo?

21 Yesu oohimya, “Mwiirele mwaak’ola. . .” Ni muhiwa e—ele enikhumelelaka; owo ti muteko onkel’ahu-mo. Khanireere orowa ohoolo mphironi vano. Voohilekela Orwa w’Apwiya Yesu. Ni nihaana okhalana waamini wa okuxiwa muKereja wira nirukunxiwe naanaanoru mwa waaphila wa niitho wira nirowe, ahiiso khaninrowa. Masi muhivela-vele, enookhala weiwe. Enookhala weiwe. Nto okathi oweriya wa ekerej’ela onrow’aya ovenya, enimwaavenxa axinn’aya; oweriya wa ekerej’ele onovenya, onimwaaruha axinn’aya; oweriya wa ekerej’ele onimwaaruha axinna akina; nto onookhala ohihimuwa w’atthu othene. Nto hiyo ninwehererya yeeyo.

22 Vano, muhiliyale, ittikitti sa mavekelo voosiisu iwoora thanu na tthaaru mpakha thanu na tthaaru ni minuutu miloko miraru. Vano kinaavekela ale ari vaava, okathi uwo ahiye okawa ittikitti, etthike, yakilaathi, (munnona?), okhala wira okathi uwo khino anrowa wira ekanwe-ene sothene khula enamuna, wala okhuma vaavo ninrowa opacerya nipuro nlo. Amiravo anoovenya, etakanxe ittikitti sothene ohoolo wanyu, vano nyuwo mwatthuna vale emosa, mwatthuna emosa, wala voottharelana siiso. . . Vano okathi onrw’aka, kinoo. . . Nipuro pi nipuro Apwiya anihimya’aya wira kiihane okhuma. . . Nto Awo yahimya wira, “Muhiihane nnakhala,” nkinrowa wiihana sothene iyo (munnona?), hata wira ti nvi.

23 Nto ka. . . Mutek’owo ohanle omalamala khula enamuna; yookhala etthu yuulupale enoorwa. Muupuwele, ti vaavo khula okathi enihimmw’aya vaplataforma va wala vapulpitu, nto khenavonyeyeke nlelo. Munnuupuwela mutek’ole wa ntata? Munnoona ithu wiiraly’aya? Miyuupuwelo sa mmurimani, munnoona etthu wiiraly’aya? Vano nwehe ela: mulavule Masu, nto moone etthu Awo aniir’aya. Munnona? Kaahooleelani va iyaakha sivinre—ekereja (kinlavula n’atthu a mutapernakulu)—iyaakha sivinre, iyaakha tthaaru wala xexe sivinre, yookhala etthu yaahala okhaliha etthu; ehanle okhumelela. Nto eri va naanaano etthukuwaka. . . Enimwiipaka mmansaya. Vano, hiyo ninnixukhurela yeeyo. Oh, moota nry’ahu ooxukhuru. Ootteeliwa murima.

24 Vano, nookhalana sookoha kamosa-kamosa soolipa va, nto nintthuna nikelele seiyo naanaanoru. Ookhala owehale

iliivuru iya sothene kaarin'aka. Miyo khwira, "Ahe, mulopwana mmosa oosuwelaxa onniphavela emosa." Masi miyo nkihiyo mutthu oosuwelaxa. Kihaana okhalana sinci-ene seiyo wira kiwehe. Ahe, ola ti Diaglott, nto ola Bibiliaa, vano ela elikanelo ya moolumo. Tivo eyo e . . . Ninrowa waavekela Apwiya wira enikhaliherye ni enettiherye wira naakhule sookoha iya nittharihaka paahi otthuna Waya w'eMuluku ni Masu Aya.

<sup>25</sup> Tivo vano, nrowe nuurame muru okathi vakhani paahi wira nivekele. Pwiya, hiyo ninnooxukhuruni Nyuwo muhina mmurimani mwahu mwaha wa etthu Nyuwo muniiireny'anyu ohiy'ula wookiserya miraru. Oh, owoona arumeyi okumana ottuli iwe musaala n'uvahana matata, ni waamini wuuluuliwe, ni—ni nivalo nsya wira nipaceriwe. Kinniihaniwaka mutelefoonini . . . Nto mirima sahu sinoohakalala, ni atthu yaakhelaka Eroho Yowarya vamanly'aya okhala—woona Masu Aya, moota Awo anihimy'aya oratteene mwiirelo ti mwiirelo wira yaakhele Eroho Anyu Yowarya. Hiyo ninnixukhuru mwaha wa yeeyo, Pwiya.

<sup>26</sup> Nyuwo munnikhalihi itthu okhweya wa hiyo, okhala wira hiyo n'atthu owiiyeviha. Nto hiyo ninnivekela, Muluku, wira—wira Nyuwo munitthuniherye hiyo voomalela niikhalihe owiiyeviha okathi wothene. Tthiri eyo . . . Okhala wira ole oniiyeviha onimunnuwiihiwa. Vano osuwela wa molumwenkuni ti elolo vamaithoni va Muluku; yoomusivela Muluku wira mwaha wa elolo ya olaleya owoopole ale yaarimenle.

<sup>27</sup> Nto vano, Tithi, sookhala va ni miyo sookoha sinci-ene sikohiwe okhuma mirima sowiiyeviha sikhante ti sinaasiwa. Nto emosa aya waakhuliwa voovonyeya pooti omuroiha mutthu ephiro yoovonyeya, oruhela muthuko woovonyeya mwa yookoha aya anaahaaxa. Tivo Pwiya Muluku, kinvekela wira Eroho Anyu Yowarya ekhale vasulu vahu ni yuupulule itthu iya, maana yolempwa mwa Soolempwa, "Nvekele munimwaakhela; mphavele munoophwanya; mmame mukhora munoohuleliwa." Nto ti yeeyo eniir'ahu vano, Pwiya, nimanaka mukhora Anyu wa omoriwa ikharari. Neemenle-ene vamuuttutthini va exariya Anyu y'eMuluku, ninvekela Ephome ya Kristu a Muluku wa Eroho Yowarya.

<sup>28</sup> Ni hiyo khaninrwa ohiy'ula mwaha wa ola okhala ohiyu wookiserya wa ohiyu miraru nilaleyaka mwaha wa Eroho Yowarya, ninrwa ni ntittimiho wa muhinaxa ni ekhweeli. Ninoorwa ntoko wira ola ohiyu wookiserya waarow'ahu okhala mulaponi. Ninoorwa naaminiki wira Nyuwo munimwaakhula mavekelo ahu. Nto Pwiya, ninoovekelani vano munihakalalihe ni Ekumi Anyu Ehinimala. Nto ni waakhula wa Masu Anyu, Eroho Yowarya . . . Oh Muluku, ntoko sisuwenly'ahu wira ti Nyuwo eriyari ahu, ninvekela wira Eyo enuupululele ohiy'ula itthu sinthun'ahu. Ni naathuna paahi wira minepa sahu sikhale voomumula, ni miyuupuwelo sahu ni murettele, ni

nimwaaminiki Muluku wira neette nikelelaka ohoolo wira ninlele iparakha Eyo elaihenry'aya. Hiyo ninvekela mwa Nsina na Yesu. Amen.

<sup>29</sup> Vano, kihaana sookoha sothene kivahiw'aka, ohiya emosa. Ni koomwaakhula Mwamunna Martin yoowo aakikohale etthu emosa nsuri ohiyu, emosa paahi. Yaahikhala anci-ene va nsana ohiyu, masi waari ovekela mavekelo. Nto Munna Martin khukikoha etthu mwaha wa Yohani 3:16—wala Yohani 3, kookupali, mwaha wa, “Vahikhanle wira mutthu onooyariwa ni maasi ni Eroho, khonoona Omwene,” nto kaalikanyinhe ni efiita kivelelihaly'aka mwaha wa aHeperi. Vano kikumana ni yoowo esaala ya wiithela nno nsana ohiyu, ni—kihinatthi okhalana okathi w'omwaakhula, vano nto kiirale siiso iwe, wa nisomi nlo.

<sup>30</sup> Vano, ookhala mutthu va ahaakhanle vaava nsana ohiyu? Nrowe noone matat'anyu, ale yahaakhanle vaava nsana ohiyu. Oh, hiyo, naanitthuna mwaakhanle ni hiyo. Naahiviriha okathi wooreerexa. Eroho Yowarya . . .

<sup>31</sup> Khino, mwa minuutu mmosa . . . Khenrowa osikuliha. Ela enookaravariwa. Nto vakhala wira enimwiiraneya murumeyi o—wala mutthu onoovaanyiha ele enrow'aka ohimya vano, wala mwa sookoha, kinvekela, munna, wira muhoone okhala yootikiniha, masi wira—muupuwele wira efiita ela enipakiwa mutapernakulu mwahu va. Hiyo ninwiixuttiha athu ahu. Arumeyi anci-ene a waamini woohiyana-hiyana akilanthé vaava. Ni kaatthuna kikelele-tho nisomi, maana aakhala athu ahu kamosa-kamosa yahaawenrye ovolowa nsana ohiyu kinoon'aka wira ari vaava. Ni kaatthuna kikele mwa yeeyo okathi vakhani, mwatthuniherya vale, yeele kilavunly'aka nsana ohiyu; nto eyo yaari mwaha wa Pentekosite, wa waakhela Eroho Yowarya.

Vano, kisomaka *Emphatic Diaglot* ya otaphuleliwa w'Ekreku, vaavo kaary'aka-vo nsana ohiyu, yeeyo ekhanle yookhunliwa ohoolo waka naanaano va. Iwo otaphuleliwa woopacerya okhuma Ekreku mw'Enkelesi. Khenivira w'ataphuleli akina, ti—ni itaphuleliwo sikina, eri ovenya wene okhuma Ekreku orowa mw'Enkelesi. Vano, moolumo a Enkelesi, imaara sinci-ene aakhallana soohimya sinci-ene, ntoko kaarow'aka ohimya vano, *board*. Mukuxe nuulumo nlo *board*. Mwaamwiira, “Ahe, owo aahimya wira hiyo *naammunyoonyiha*.” Nnari! “Oh, owo—owo ooliva *esisapo* y'orentteri wawe empa.” Nnari! Ahe, owo. . . “Nookhala *nipawe* oloomoni w'empa.” Ahe, munnona? Wala khula wa yaawo. . . Aakhala moolumo maxexe wala mathanu yaakhanle orumeeliwaka; muhaana okuxa ehimyele. Nuulumo *see*. *See* enihimya “osuwela saana,” mw'Enkelesi. *Sea* enihimya “maasi.” *See* enihimya “oweha.” Munnona? Masi mwa itaphuleliwo iya, nuulumo nirumeeliwe va, kaalavunly'aka nsana ohiyu mwa Miteko kapiitulu 2, vaavo ehimaly'aya, “Malumi a mooro

yaanaamorela...” Vano, kaatthuna kitthikele ottuli paahi okathi vakhani paahi. Mwaanitthuna, okathi vakhani, woonatho okathi vakhani nihinatthi orowa ohoolo?

<sup>32</sup> Vano, mukhunle, etaphulelo anyu ya King James wala khula etaphulelo munsom’anyu-vo...Nto kintthuna kisome. Nto nwiiriyane saana vano. Muhivonye wiiwa. Anci-ene olelo, hata murokor’aka, anci-ene aamwaattaka telefooni, khwira... Muhano Morgan...Anci-ene aya yaari vaava nsana ohiyu. Muhano Morgan ti mmosa w’axinn’ihu wammalenle ororomela; ni owo aari mulistani w’ale oohalela okhwa oLousville wa iyaakha, muloko ni thanu na mosa muloko ni thanu na piili aarina kankuru. Kinoona wira okilanthé ottuli nno tho ohiy’ula. Khaawerya wiiwa, owo iirale, okhala wira kaalavula kaattamenle-ene mikorofooni. Nto mwaha wa yaawo kintthuna kitthikele yeela okathi vakhani.

<sup>33</sup> Vano, kinsoma mwa Yoolempwa ela ya Miteko 2:

*...vaaphiyalyaya nihiku na Pentekosite, awo othene yaari ni muupuwelo mmosa... (Vano, okisivela saana ovikana wira mwiiwanano mmosa: okhala wira mwaamuwerya okhalana mwiiwanano mwaha wa khula nisomi, masi va muupuwelo aya waari mmosaru.)... muupuwelo mmosa ni nipuro nimos.*

*Nto naanaanoru waahiiwanyeya okhumaka osulu oruma ntoko epheyo yoowali ya ikuru, yaasanrye... e mpa mothene awo mwaaryaya. (Ehikokhonre, ehilompaka, masi ekilaathanse.)...*

*...Malumi ookawenyeya... (M-a-l-u-m-i—malumi. “Ookawenyeya” enihimya, “oomeyeya.”)... Malumi... yaahaakhumelela...ntoko...mooro, nto mmosa... (“Mmosa,” mmosene)...naanimmorela khula mmosa a yaawo.*

*Nto othene aya yaahisareya... (“Nto,” etakanxo)... othene aya yaahisareya Eroho Yowarya, ni khupacerya olavula ilavulelo sikina, ntoko Eroho Yowarya yaavah’aya wira elavuleke.*

*Vano yaanikhala-wo oYerusalemu aYuta, atthu ooweettela etiini, jaarwiiye ilapo sothene vathi v’erimu.*

*...okathi ela yaaryaya...waiwanyeyi’aya oruma iwo, yaahithukumana atthu, ni yaahikhala ootikinhiwa, okhala wira...khula mutthu aawiiwa e...elavulaka elavulelo awe.*

<sup>34</sup> Vano nwehe! Okathi oruuly’aya mooro, yaari malumi; okathi yaalavul’aya, naari nntaava. Vano, yookhala evirikanelo yuulupale ya malumi ni mattaava. Wa hiyo sothene emosaru. Masi, mw’Ekreku, “nlumi” enihimya *ela*. [Munna Branham onimooniherya—Mol.] Niyaru ti *nla*. Munnona? Eyo khenihimya



nttaava; enihimya mpantte w'erutthu anyu nikhlanle n lumi. Mwaweha vale, entaphuleliwa *malumi a mooro* enihimya "ntoko malumi," ntoko ekhalaasa ya mooro, nikhala noorekama na mooro. Vano, nwehe olupiherya vano. Nto khula nimosa wa mapuro ale vano, muhiliyale.

<sup>35</sup> Vano, ninrowa wooniherya ethweelelo ekhaani ohiy'ula. Ni kinrowa woohiyeryani yeenyu. Vano muupuwele, etthu p'itthu yakhala yoovirikana, eyo ti yawinyu. Masi enamuna emosa paahi mutthu ti mutthu okhanly'awe ophwanyaka etthu wa Muluku enkhala mwaha wo waamini. Ni muhinatthi o . . .

<sup>36</sup> Kihaana osuwela etthu eniir'aka kihinatthi okhalana waamini wa etthu eniir'aka. Mwaathelenleni amwaar'inyu? Mwaarowaamini. Nyuwo mwaahiwehererya, khwaawehaweha, khuwoona akhumm'aya-wo, ole yaary'aya. Ti siiso enkhala'aya ni Soolempwa, ni Muluku. Ti yeeyo enikhaliha soowoona iya, n—Nlumi nla na Mooro, itthu iya sothene, okhala wira Muluku oolaiherya. Muluku ohimmye siiso. Miyo koomwehererya ni Masu Awe khusuwela wira Awo Ekeekhahi. Ni nyuwo muntthara Masu Awe. Vano vakhala nipuro vari yootikiniha vakhani, nto yookhala etthu evonyeiye nipuro nlo. Okhala wira Muluku (nwiriyane!)—Muluku khonatoko ovara ni khonrowa ovara muteko ahiyaka Sawawe—wala voovirikanyiha ikano Sawe. Eyiita khenrowa orwa okathi w'elimwe, ni elimwe khenrowa orwa eyiita. Makukhu khanrowa omora okathi w'ephovo nave anarwa-tho ephovo ekina. Khamunwerya wira.

<sup>37</sup> Ntoko sihimaly'aka nsana ohiyu wa ehimye ya naattuuttu, ekhuwariki soolima sanyu. Wala vakhala wira munimweemela va eriyari y'ematta, ni ery'ene yooriipela w'epiphi, nto nyuwo khunaira, "Oh, eletrisitaate yuulupale, koosuwela wira muri mmatta. Vano, koorimeela, nkinsuwela onrow'aka. Enivaha muthuko, wira kiwerye woona moota wo wetta! Yookhala eletrisitaate yoophiyerya wira emwaleele ematta." Eyo ekeekhahi. Ayo, mulopwana! Yookhala eletrisitaate yoophiyerya musaala mu wira emwaleele hata sihikhalaka mithuko, sihikhanle. Masi muhaana weettiherya. Vano, nyuwo khino mwaamukhuwelela yeeyo mpakha ohiwerya okhuwela-tho, eyo khayaarowa opatta. Masi mwavara-ru muteko muttharihaka ikano sa eletrisitaate, vano munookhalana waarya.

<sup>38</sup> Ahe, ti siiso siry'aya ni Muluku. Muluku ti Mpattuxa muulupale a erimu n'ilapo ya vathi, mmosaru nsana, olelo, ni mahiku othene. Owo nlelo Mulukuu. Masi Owo onvara muteko okathi muntthar'anyu ikano Sawe ni miixuttiho. Apatthani, kinihimya ela: Miyo nkinatoko woona evonyaka, ni khenivonya.

<sup>39</sup> Vano, nrowe niwehe. Yesu mwa Luka 24:49 aahaaruma arummwa vaamanly'aya woopowa ni oreerihwa ntoko sinihimy'aya Masu; okhalihwa anaxariya mwaha wo omwaamini Pwiya Yesu; oreerihwa mwa Yohani 17:17 okathi

Yesu iiraly'awe, "Mwaareerihe, Tithi, mwa Ekeekhai. Masu Anyu ti Ekeekhai." Nto Owo aari Masu.

<sup>40</sup> Vano, mwaavahe owerya wo waavoniha aretta, owoomola axetwani, waahihimuxa alipa-ookhwa; vano awo yaahokolowanse etthapaka. Ni masin'aya yaari muLiivuruni mw'Ekumi ya Mwaapwittipwitthi. Nyuwo munnuupuwela moota silavunly'ahu yeeyo vano. Masi awo nlelo khayaarukunxale murima. Yesu aahimuhimeerya Petru ohiyu w'okhomeliwa Wawe; Owo khwira, "Mwarukunuxa murima, mwaalipihe axinn'inyu."

<sup>41</sup> Eroho Yowarya . . . Nyuwo munaamini wa Ekumi Ehinimala, masi okathi Eroho Yowarya enrwa'aya Eyo Ekumi Ehinimala. Nyuwo munaamini wa . . . Nyuwo muyariwe ni Eroho wooreerihwani, masi khamuniyariwa ni Eroho mpakha Eroho Yowarya okela. Eyo ekeekhai. Mwaana ookhalana ekumi mmirimani mw'ame awe, mitika sikhaani sinniphureya; eyo ekumii. Masi eyo ekumi enivirikana okathi ommumul'awe omumula w'ekumi mphulani mw'awe. Ti yoovirikana. Ti yeeyo, eyo . . .

<sup>42</sup> Munn'aka Mmetotista oophentiwa, ni Nawetta a Osantu, ni muNasareeno, opatiiso wa Eroho Yowarya woovirikana ni oreerihwani. Oreerihwani t'urapihiwa, ekhanle elokiheryo y'Ekumi. Masi okathi Eroho Yowarya enrwa'aya, Eyo Ekumii. Olokiha ti okukuttha mwaapu; Eroho Yowarya ensariha mwaapu. *Oreerihwani* enihimya "okukutthiwa khuvalaanihiwa wira evareliwe muteko." Eroho Yowarya okhaliha mmutekoni. Nyuwo mwa mwaapu Muluku okukutthaly'awe.

<sup>43</sup> Nto ninniphwanya wira Eroho Yowarya ti Muluku Mwaneene mwa nyuwo. Muluku aari vasulu vanyu Munlumini na Mooro ni Moise. Muluku aari ni nyuwo mwa Yesu Kristu. Vano Muluku ori mwa nyuwo mwa Eroho Yowarya. Kahi amulukuru araru, Muluku mmosa avaraka muteko mwa miteko miraru.

<sup>44</sup> Muluku eemereryaka, akhuruwaka okhuma vasulu va mutthu. Owo khaawerya omukwannya Yoowo, okhala wira aahittheka omatta w'Edeni khwiivalaaniha opatthana Wawe. Vano xeeni yiiraneeye? Owo aahaana okhala vasulu vawe. Ephome y'amwaanyompe ni ipuri khiyaamutthuniherya Owo opatthana-tho ni mutthu; masi mwa ikano ni sooruma, sooniheryaka eruku wa okathi ula waarwa, wa ovaha inyompe, ni sikina, ni ipwittipwitthi . . . Vano okathi Muluku okhuruwaly'awe khukhala mw'erutthuni yooreerihwani, ooyariwa ni muthiyana harus, Muluku Mwaneene . . . Moosuwela etthu iiraly'awe Muluku? Owo—Owo khairale etthu masi paahi . . . Owo aahenle eheema Awe eriyari ya yawihu. Muluku aakhala Muheemani yihaniwa Yesu Kristu. Owo aataphunle Eheema Awe ni hiyo, khukhala . . . (kino—

kinoolaleya yeeyo voosisu, tivo vanreerela kiihiye siiso.) Vano, eyo—Muluku aakhala sayi ni hiyo. . .

<sup>45</sup> Nto vano Muluku ori mwa hiyo. Yesu oohimya mwa Yohani 14, “Nihiku nenlo munoosuwela wira Miyo kiri mw’Atithi, Atithi mwa Miyo, nto Miyo mwa nyuwo, vano nyuwo mwa Miyo.” Muluku mwa hiyo. Exeeni yaari ethunelo? Okeleliha ohoolo etthokiheryo Awe.

<sup>46</sup> Muluku aahikhalana etthokiheryo. Owo aatthuna avare muteko eriyari ya mutthu, vano Owo khuruuha Munlumini na Mooro, yoowo waari Mooro wa siiri wiithomeya vasulu v’ana a Isarayeli. Vano Mooro yoowo waahiisooniha mw’erutthuni mwa Yesu. Nto Owo aahimye wira aari Mooro yoole, “Abrahamu ahinatthi okhala, MIYO KOOKHALA.” Owo aari Mooro yoole. Owo iirale, “Miyo kikhumme wa Muluku, ni kintthikela wa Muluku.” Nto nuvira okhwa Wawe, ovithiwa, ni ohihimuwa, Paulo Oowaarya aahikumana ni Yoowo arowaka—nsina nawe nlelo nry’ene Saulo—arowaka oTamasiku, nto Owo aahitthikela-tho okhala Nlumi nenle na Mooro. Waarya waahimukhalaha oohoona. Ti yeeyo.

<sup>47</sup> Nto Owo ori va olelo, Nlumi na Mooro nimosaru, Muluku mmosaru apakaka ithoonyeryo imosaru, miteko mimosaru. Mwaha wa xeeni? Owo onvara muteko eriyari y’atthu Awe. Owo ori mwa hiyo. Miyo. . .Owo ori ni nyuwo vano, “masi Miyo kinookhala mwa nyuwo. Miyo kinookhala ni nyuwo, hata mwa nyuwo, mpakha woomalelani,” omala olumwenku. Owo aamukhala ni hiyo.

<sup>48</sup> Vano, nwehe. Yesu aahaaruma orowa oYerusalemu olipelela. Nuulumo *muhaleke* nnihimya “olipelela,” khenihimya ovekela, nnihimya “olipelela.” Awo khayaalikanne nlelo wira yalaleye, okhala wira awo yaasuwela ohihimuwa Wawe paahi mwa Omutthu Awe, mwaha wo omoona. Owo—Owo khaarumme olaleya tho, ohivar’etthu mpakha toko waakhela Owerya okhumaka wirimu.

Nkinkupali wira khula mulaleyi onivelelihiwa ni Muluku wala okhanle orummwaka oratteene. . .Okhala wira Muluku t’ohimala. Nto ele Muluku oniiir’awe emaara emosa, Owo onniira okathi wothene. Vano, vakhala wira Muluku khaahiya ale olaleya mpakha orowa oPentekositeni ni waakhela musuwelelo wa Pentekosite, khaavo mutthu, vahikhanle wira onookhalana otthuna wowiixerya wala mutthenkeso omurumme, orina ihakhi w’okela vapulpitu mpakha akhale oosareya Eroho Yowarya. Eyo ekeekhaii voolikana. Okhala wira owo oniweettiherya ni muupuwelo wa otthokelela wa mutthenkeso mpakha osareye Eroho Yowarya; vano nto, owo onimwaavaha yolya ya epompa; *Mwaapwittipwitthi ni Epompa*, ntoko silavunly’ahu nsana ohiyu.

<sup>49</sup> Vano nwehe. Owo iirale, “Murowe oYerusalemu nto mwakhale weiwo; mulipelele paahi mpakha kinveleelihe natiri a Atithi.” Vano nto, awo yiirale exeeni? Yaahikhala imiya piili ni miloko miili a yaawo, alopwana n’athiyana. Awo yaarowanse empa y’osulu mpaani m’olompa.

Vano, naanaattamela nihiku na Niira na Pentekosite, w’oreerihwa empa y’okokhorela, wiiviwa wa mwaapwittipwitthi a paasikha mpakha o—orwa wa Pentekosite, saari mihokorokho soopacerya s’ohepha, yopeeli, yopeeli a Pentekosite. Ni mmatekeloni mme. . .

<sup>50</sup> Vano, miyo kinnikhalaka ilapo seiyo. Ilapo sa onikhuma nsuwa ti voorika okhalana exikatta mpaani. Exikatta yaari vate. Ninnihimeeriwa, vate v’empa y’olompa, yaahikhala exikatta yaamuroiha mutthu mpakha ekatthi yaamukhaani iwe; mwaamuwela osulu, osulu, osulu, mpakha ophiya ekatthi yaamukhaani osulu iwe, ntoko nipuro n’osuka-wo itthu osulu w’empa y’olompa, muthinto mmosa wa empa, empa y’osulu. Ni Bibilia ohimye wira awo yaarisa memmo ni mikhora saahiwaliwa, okhala wira yaaniwoova aYuta, okhala wira awo yaanaalupattha mwaha wo omukokhorela Pwiya Yesu, numala Kaifa mukhulupale a anamukuttho, ni Ponsio Pilato, n’akina omwiwa Owo. Tivo awo yaarowa wiihuluxa othene yiihaniwa aKristu. Nto mikhora saari soowaliwa, vano awo yaamulipelela.

<sup>51</sup> Vano, ikatthi iye siiso, khasikhanle icanela. Ianela saakhala itthu sikhaani soottiyeliwa ntoko mikhora, nyuwo mwaahul’anyu. Muhina mwa ikatthi iye saanikhala mithuko sikhaani sa makhura saathomeiwa ni opatta. . . Vakhala wira mootoko okhala oCalifornia oKantina ya Clifton, mukhuruwele vathi, munoophwanya etthu emosa yoolikana, y’empa y’osulu. Mootoko okhala weiwo? Akavi mu atonko okhala weiwo? Kinniwoona athu ottikinya muru. Ahe, moosuwela etthu enihimy’aka. Vaareera. Mukhuruwele vathi vale, munimoona Ematta ya oKetisimani; muhinatthi, munookela emosa wa ikatthi iye sa epanthe onikhuma nsuwa. Eyo ekeekhai voolikana. Weiwo munoophwanya muthuko mwaamukhaani osanrye-ene makhura a olivera ni nthampo na manri niry’ene memmo, nivarelaka.

<sup>52</sup> Vano, nrowe niire yaarisa osulu iwe, ewelasaka exikatta ela yaari vate. Yaahiphiyasa iwe khwiipitha, okhala wira yaaniwoova aYuta. Yesu khaahimenrye wira erowe empa y’osulu. Owo iirale paahi, “Mwalipelele oYerusalemu.” Awo yaarisa vathi wa mpaani, ti voorika ohimya etthu yaarowa okhumelela. Awo yaamurowa ovolowa yaavare. Tivo awo yaarowanse ekatthi yaamukhaani ya khalayi osulu, osulu vathi v’epatho, nto weiwe, khuttiyelasa ekatthi wira aYuta ehiwerye waavarasa. Nto awo khukhalasa memmo elipelelaka mahiku muloko.

<sup>53</sup> Vano, vano, niri mwa Miteko 1. Vano, nwiriyane oratteene

vano. Moophwanya elatarato ene? Ota w'empa exikatta ekhaani yaarowa osulu, vano awo yaavolonwe ekatthi yeela yaamukhaani. Muhina w'empa y'olompa awo yaarina Niira na Pentekosite. Oh, yaavirihasa okathi wooreera. Vano, vaphiyaly'aya nihiku na Pentekosite, awo othene yaari ni muupuwelo mmosa, muupuwelo mmosa, yaaminiki wira Muluku aamurowa onveleeliha natiri ule. Khula mutthu mu akhale mwa muupuwelo yoowo ohiy'ula ni oone etthu enikhumelela. Ehaana othhikela. Owo natirii siiso ntoko awo yaarinas'aya. Munnona?

<sup>54</sup> Awo yiira exeenii? Yaatthara miixuttiho, yaatthara i—i—ikano sa Muluku: “Olipelela mpakha . . .”

<sup>55</sup> Vano, awo yaawoova aYuta. Vano, muupuwele yeeyo. Awo yaawoova aYuta. Vano, naanaanoru waahiiwanyeya oruma ntoko epheyo enoopa n'ikuru. Khayaari hata epheyo enoopa n'ikuru; yaari ntoko epheyo enoopa n'ikuru. Kinosoma isuweliheryo minuutu vakhani paahi sa mutaphuleli. Yaari ntoko epheyo enoopa n'ikuru. Mwa moolumo makina, yaari epheyo ya wirimu (oh!), etthu awo yaawery'aya wona. Epheyo yaari muhina mwa yaawo. Yaahirwa e—epheyo enoopa n'ikuru, ntoko epheyo enoopa n'ikuru. Epheyo khayooopa n'ikuru, masi yaaruma ntoko epheyo enoopa n'ikuru, ntoko etthu sa: Whish! Mootoko wiiwa? Oh, wulu! Ntoko epheyo enoopa n'ikuru. Vano nwehe. Vano yaahisarya . . . Vano, mu ehimmye wira, “othene,” masi mw'Ekereku ehimmye wira, “Mothene (Eleetera yuulupale M-o-t-h-e-n-e), Mpa Mothene,” mapuro othene mme. Khula munyatta, nlotho, muthari waakhala ntoko woosarya yeeyo. Kahi wira, “Eyi, Axinna, munnoon a noon'aka?” Nnari! Yaari mapuro othene, ntoko epheyo yoopa n'ikuru. Vano nwehe. “Waahiiwanyeya oruma ntoko epheyo enoopa n'ikuru ni (etakanxero. Vano nwehe *ni* iyo. Nyuwo mwaahiire, munimwiiriha Eyo ohimya etthu ehinihimy'aya. Munnona?)—ni ntoko (ti yeeyo yiiraneiy e voopacerya waari oruma, etthu ntoko e—epheyo ya ikuru jaarweenle)—ni (munnuupuwela, nsana ohiyu kaahirowa opasari khuthuma ephawu ni enama. Eyo yaari etthu jaarowa ni yeeyo. Ephawu etthu emosa, enama etthu ekina. Vano oruma waari etthu emosa yaattikinnye)—vano khaarweela, (ohoolo waya) malumi—malumi ookawanyeya.”

<sup>56</sup> Ookhala mutthu va otonko wona efiilime ya Cecil DeMille *Sooruma Muloko*? Mooweha okathi Sooruma saalempw'aya? Moota owo aaphwannyaawe, miyo nkaasuwenle. Saahikhala itthu piili wala tthaaru koonaly'aka mwa yeeyo vekeekhai yaahikisivela. Etthu yoopacerya waari waarya iwe wa esmeralta, ti yoowo Eyo yaalattan'aya oratta-ene. Munnona? Etthu ekina waari okathi yaalempw'aya Yooruma, nto vamanly'aya, mooweha evavaka okhuma Vanlumini nenle nuulupale na Mooro, wira saahikhala ikhalaasa sikhaani sa mooro sivavaka? Mooweha yeeyo? Vano, ti yeeyo kinuupuwel'aka wira ela ti yaary'aya oPentekositeni. Jaarweenle yaawo . . . Tivo awo

yaaniwerya woona Eyo. Miyo nkihimye wira, “Yaahimorela mwa yaawo.” Masi yaahaarweela ikhalaasa (nnimwiihana), malumi, ntoko n lumi ntoko n lumi nla va, [Munna Branham onoothoonyerya—Mol.], ekhalelo ya n lumi, ekhalaasa ya mooro. Vano, naaru—ntoko sihimaly’aka, naaru naaru; ekatha ekatha. Ekatha khenihimya wira muhona; enihimya wira yaakhala ntoko ekatha. Ni naakhanle-ru naaru, khayaahimya wira yaarimwiiwa; yaakhala ntoko naaru. Ola waari mooro waakhala ntoko n lumi, kahi mutthu alavulaka, mooro waakhala ntoko n lumi.

57 Vano, nwiriwane. Nwehe moota Ekreku enihimya’aya va:

*Nto naanaanoru waahiiwanyeya oruma...ntoko epheyo enoopa n’ikuru... (ya 3—eversii kulu ya 3.)*

Nto malumi ookawanyeya *yaahaarweela...* (Kahi malumi ookawanyeya yaari mwa yaawo, wala wira awo yaalavula ni malumi ookawanyeya; yaari malumi ookawanyeya jaarweenle. Vano, nwehe. Khayaari w’awo nlelo. Yaari mpaani mme, ntoko erukureryaka mpheyoni mu.)...*awo...ntoko...mooro...malumi ookawanyeya...yaahaarweela...* (yaari ohoolo waya) *ntoko...mooro*, (malumi ntoko mooro) *nto* nimosa (nimosa nene) naakhala vasulu va *khula* mmosa a *yaawo*. (Khayaakenle mwa yaawo; masi naakhala vasulu va khula mmosa a yaawo.)

58 Vano, n koonani moota King James aarow’awe oriha eyo: “Vano malumi ookawanyeya yaahaarweela, ahiiso yaakhala (enihimya sayi mmo mwa King James?) yaahaamorela.” Munnona? Vano, khivaaweryaneya orowa okilaathi. Hiyo noosuwela eyo. Masi y’ekeekhai ehimye wira, “Yaamumula wa yaawo,” kookupali; kahi siiso? Mukihiye kiphwanye vekeekhai voolikana. Ayo! “. . . yaamumula vasulu va khula mmosa a yaawo.” N lumi nimosa na mooro naamumunle vasulu va khula mmosa a yaawo. Munnoona vo? Munnisuwela saana? Eyo t’itthu yanenli yaakhumelenle. Yoopacerya yaari epheyo, vano khukhumelela malumi a mooro.

59 Waari ekatthi yeela yaamukhaani va ni mithuko iya sikhaani sa makhura a kuluwe sivarelaka. Nkawuupuwelaseni awo akilaathanse-ene iwe. Nto mmosa khwira, “Oh!” Owo khuweha mpaani mothene; yaari mpaani mothene. Vano awo khwira, “Nkawehani!” Malumi a mooro khupacerya weetteetta mpaani. Vano nwehe. Nto vo yaahikhumelela malumi ala a mooro.

Vano nwehe enttharelana:

*Nto (Etakanxeryo ekin a; etthu ekin a yaahikhumelela.) awo othene yaahisareya Eroho Yowarya...* (Etthu yanenli yaahikhumelela.)

60 Vano moone, ninthuna nirukunxe yeeyo niiraka, “Awo jaarina malumi a mooro, nto va enakwakwaruwa mwaano; vano

nto khukhuma khupacerya olavula ni elavulelo yoohisuweliwa.” Khiivo etthu ene ntoko yeeyo mwa Soolempwa, mpatthani. Khula mutthu onlavula elavulelo yoohisuweliwa wa waakhela Eroho Yowarya enninvirikanya Bibilia. Nto kinrowa owoonihani minuutu vakhani ni owooniheryani wira kinnaamini olavula ilavulelo soohisuweliwa, masi khuhiyo waakhela Eroho Yowarya. Eyo ti yoovaha ya Eroho Yowarya. Eroho Yowarya Erohoo.

<sup>61</sup> Vano nwehe. Malumi ala yaari mpaani ntoko mooro, ni yaakhala vasulu va khula mmosa. Vano awo yaahisareya Eroho Yowarya (etthu yanenli), vano nto, numala osareya Eroho Yowarya, yaahilavula ni mattaava, kahi ni malumi, ni malavulelo. Moowehe yeeyo? Awo yaahipacerya olavula malavulelo makina ntoko Eroho yaavah’aya wira elavuleke. Vano, ela yaahikhala enyakunyaku.

<sup>62</sup> Vano nwehe. Vano, nrowe nikuxe-tho eyooniheryo wira muhiliyale vano. Nittharihaka Soolempwa, empa y’osulu elipelelaka, naanaanoru oruma ntoko epheyo ya ikuru, yaari wa yaawo; eyo yaari Eroho Yowarya. Akavi anaamini wira iwo waari orwa wa Eroho Yowarya? Ntoko epheyo, epheyo ya wirimu. Vano awo yaahiweha. Mme yaahikhala malumi makhaani a mooro, emiya emosa ni miloko miili a yaawo, khupacerya wiikhaliha ni omumula vasulu va khula mmosa a yaawo. Yaari exeeni? Yaari exeeni? Nlumi na Mooro, yoowo aari Muluku Mwaneene aikawanyaka Mmansawe eriyari y’atthu Awe, arwaaka mw’atthuni. Yesu aarina etthu yothene; Owo aarina Eroho woohikhala mphimo; hiyo ninkhalana Yeeyo ni mphimo (Munnoona enihimya’aka?) okhala wira hiyo nookhalihwa aana. Ekumi Awe—Ekumi Awe Ehinimala yaamukela. Vano xeeni yaakhumelenle? Vano awo othene yaahisareya Eroho Yowarya.

<sup>63</sup> Vano, kintthuna kookoheni etthu. Murumelo waapacenyere liini? Vakhala wira yaahaana okhuma emp’ele y’osulu wira erowe vathi muxikattani mme wira ephiyase vapuwani v’empa ya mwene—kiireke mpakha va—vapuwanani v’empa y’olompa, yeeyo khino yaari ekwarterawu emosa okhuma nipuro yaaris’aya, khukhuruwa ixikatta, khuphiya vapuwani vaavo atthu othene yaathukumann’aya. . . Vano awo khikhumelasa ota iwe ntoko anamuhapaliwa mwa Eroho. Maana atthu yiirale, “Atthu ala aroohapaliwa.” Awo khiyaatonko wona etthu ntoko eyo.

<sup>64</sup> Nto khula mmosa aaphavela wira, “Eroho Yowarya ehoorwa. Natiri a Muluku ori mwa miyo. Miyo—miyo koosareya Eroho.” Nto owo ary’ene muKalileya, mutthu aalavulan’awe, mutthu a wArapiya wala oPersia, aanimwiwa ni elavulelo awe.

<sup>65</sup> “Eri sayi hiyo wiiwa (kahi ni elavulelo yoohisuweliwa)—nniwiwa sayi khula mutthu ni elavulelo niyaraniw’ahu. Othene ala anlavula kahiyona aKalileya?” Nto khino yaalavulasa

eKalileya... Masi okathi yiiwaaya, yaakhala ni elavulelo awo yaayariw'aya. Vaahikhale siiso, kintthuna wira mukikohe—mukaakhule ela: Yaari sayi Petru aavenyaly'awe khulavula mw'eKalileya, vano muttitthi wothene khunaiwa etthu aahimy'awe? Atthu ikonto tthaaru yaahirwa wa Kristu vaavale vene ni Petru alavulaka elavulelo emosa. Vekeekhai! Aari Muluku apakaka mwiiriirya. Petru, wa muthukumano mmosa waari w'atthu yaakhala oMesopotamia, ni amalapo, n'anamathara, ni othene yaakhuma molumwenkuni mothene yaaphwanyaneya vaavale... Nto Petru eemenle-ene ni alaleyaka mwa elavulelo emosa, ni khula mutthu aanimwiiwa, maana atthu ikonto tthaaru yaahirukunxa murima khupatisiwa mu Nsina na Yesu Kristu naanaanoru. Enkhala sayi yeeyo?

<sup>66</sup> Nkoonani, apatthani, nkinwehererya wira munn'aka a muromolelo, muPentekosite onimwaakhela yeeyo naanaano va. Masi mwaavyaavye yeeyo mBibiliani mothene vano mukileele khula okathi nipuro awo atonko aya waakhela Eroho Yowarya vano khunalavula elavulelo awo yahaasuvelas'aya etthu yaalavul'aya. Vakhala wira eyo t'inamuna awo yaakhelans'aya Eyo iwe, Muluku mwaneene... Ehaana okhumelela siiso khula okathi.

<sup>67</sup> Vano, nkikhanle... Vano, owannyawe Korne-... Hiyo ninnuupuwela, okathi waalavul'ahu mwaha w'oSamaria, nsana ohiyu, khuphwanya wira khiyaakhanle etthu emosa yaahimya wira awo yaahiiwa elavulelo ekina, khiivo yaahimya yeeyo. Masi okathi arowans'aya owannyawe Kornelio, weiwo yaakhanle atthu a ilapo tthaaru soovirikana, awo yaahilavulasa ilavulelo. Ni okathi alavulans'aya, vakhala wira yaahilavula, yaahikhalanasa Yeeyo, Petru khwira, siiso awo yaakhelans'aya Yeeyo wopaceryani. Nto awo yaahisuwela wira Amalapo yaahaakhela mahala wa Muluku, okhala wira yaahaakhela Eroho Yowarya siiso ntoko awo yaakhelans'aya wopaceryani. Kookhalana yookoha va, etthu emosa mwaha wa yeeyo minuutu vakhani. Kaatthuna kihele mulipiheryo, wira moone exeeni iyo.

<sup>68</sup> Vano, nkinwehererya wira atthu yiixuttihwe voovirikana... Vano mukiwiriyaneyane, axinn'aka, oophentiwa, ootthuneyaxa aPentekosite. Nkaarowa wiixuttiha ela ota w'ekerej'aka. Ela ti... Nkaarowa wira etthu wira kiruueva anyihanelo. Masi naahiphwanye-ru Ekeekhai, ninruwa opacerya liini? Nihaana okhalana etthu wira yiiraneye va wira enookolele. Nihaana okhalana mahala a okuxiwa va vano. Ekeekhai ehaana okhumela.

<sup>69</sup> Mutthu aarowa wira exeeni aakhanle-ru oohiwa, ni oohilavula, ni ahinawerya olavula hata vakhani? Aamuwerya waakhela Eroho Yowarya? Ankhi ahaarina nlu mi opacerya wene, ni mutth'uwo onaphavela woopowa? Munnona? Eyo Eroho Yowarya, opatiiso. Vano nto, soovaha iya sothene ntoko olavula ilavulelo, otaphulela ilavulelo, sinkhala vammal'anyu okela



mw'Erutthuni ni opatiiso wa Eroho Yowarya. Maana soovaha iyo siri mw'Erutthuni mwa Kristu.

<sup>70</sup> Vano, etthu enihimery'aka...Vano, nkawehani va. Mwaamuwehererya ekereja Katolika, yeeyo yaari ekereja yoopacerya wiitthokiha mulaponi numala arummwa...Vano ekereja Katolika yaahitthokihiwa, oh, iyaakha imiya sene numala okhwa wa murummwa ookiserya, iyaakha imiya thanu na mosa—numala arummwa, Muthukumano w'oNicea, okathi axitiithi a oNicea yaathukumann'aya khutthokiha; vano awo khukhaliha ekereja ya mulaponi mothene, yaari ekereja Katolika. Iwe awo khukhaliha ekereja ya mulaponi mothene. Nto nuulumo *katolika* nnihimerya “ya mulaponi mothene”; eri mapuro othene. Awo...aRooma—Rooma eepakawu aaroorukunxiwa khukhala Rooma a opaapa. Vano awo khimukhaliha paapa wira akhale muhooli wira akhale nipuro na Petru, yoowo awo yuupuwel'aya ni yaahimy'aya wira Yesu aahimunnaya ihulelo sa mOmweneeni. Vano paapa owo aari oohivonya, ni nlelo ti siiso olelo wa ekereja Katolika. Wira...nuulumo nawe ninkhala ekano ni nlamulo. Owo ti paapa ohinivonya. Ti yeeyo yaakhumme.

<sup>71</sup> Vano nto, okhala wira awo khayaarowa weemererya mwixuttih'ola w'eKatolika, awo yaaniiviwa, opahiwa vanipottoni, ni itthu sothene sikina. Hiyo othene noosuwela ni soolempwa sooreerihiwa sa Josephus, ni *Eliivuru ya Ookhwela waamini ya Fox*, ni ikina sinci-ene sooreerihiwa...a*Papilooniya Aili* ya Hislop, ni a—awahala aalupale. Vano, eyo—nuvira iyaakha ekonto emosa ni imiya thanu, ntoko sinsuwel'ahu, sa Okathi w'Epiphi, atthu yaahaakhiwa Bibilia. Nto Owo aari—Owo aavithiwa ni monxe, ni sikina, ntoko sinsuwel'ahu.

<sup>72</sup> Vano numala eyo khurwa orehererya woopacerya ni Martinho Lutero. Vano khukhuma khuhimya wira ostiya yoowo aKatolika yiihan'aya erutthu—erutthu y'ekeekhai ya Kristu, yaathoonerya paahi erutthu ya Kristu. Vano aahimuriha ostiya vamukalani v'altaari, kiireke muxikattani, khukhootta wiihana erutthu y'ekeekhai ya Kristu, vano khulaleerya “Naxariya onookhala mwaha wo waamini.” Vano, muhiwehererye wira ekereja Katolika enoomweemererya, vekeekhai nnari, muhooli aya ohinivonya aaleelaka wira nnari. Vaareera.

<sup>73</sup> Vano numala Martinho Lutero, alaleyaka Okhalihiwa naxariya, John Wesley khurwa alaleyaka Oreerihiwa. Vano owo aalaleerya wira mutthu, numala okhalihiwa naxariya (ti yooreera) masi muhaana oreerihiwa, okukutthiwa, mutathaari wa sootakhala okumihwa mwa nyuwo ni Ephome ya Yesu. Vano, muhiwehererye wira aLuterano anoolaleerya Oreerihiwa, okhala wira awo khanrowa wira.

<sup>74</sup> Numala Wesley olaleerya Oreerihiwa, ni miphuwo sinci-ene saahikhuma mwa yeeyo, yaawo akhanle, Metotista aWesley,

ni aNasareno, n'akina, yaakhalinhe mooro owarelaka okathi aya, vano khurwa Pentekosite khwira, "Vano, Eroho Yowarya ti opatiiso, ni ninlavula ilavulelo okathi onaakhel'ahu Yeeyo." Khweeli. Nto varwiiy'aya yeeyo, khimwaakhanle owehererya aNasareno, ni aMetotista aWesley, n'akina waamini yeeyo. Awo khayaarowa wira. Awo yiihana xetwani. Vaareera. Exeeni yiiraneiyee? Awo khupacerya omora; Pentekosite khupacerya ovenya. Vano owo oovenya mpakha nipuro aPentekosite arin'aya ottikinyiwa. Awo ahiitthokiha khukhwa, khanikupali etthu ekina. Awo aakhalana malamulo aya ni makano, nto eyo ennimaliha mwaha.

<sup>75</sup> Vano, okathi Eroho Yowarya enrwa'aya ni wuupulula Ekeekhai ya etthu p'itthu ni wooniherya yeeyo ni Okhala Waya nave ni Masu Aya, muhiwehererye wira atthu aPentekosite animwiira, "Kinookupali iyo." Muhaana okhala meekh'inyu ntoko Lutero siiraly'awe, ntoko Wesley siiraly'awe, ni ntoko akina aya siiraly'aya. Muhaana okhala mwa yeeyo okhala wira okathi ori va. Nto ti yeeyo enikikhaliha oothanyeya. Ti yeeyo enikikhaliha oovirikana.

<sup>76</sup> Nto miyo nkikhanle opaceryaka ntoko Munn'aka oophenteya Oral Roberts, ni Tommy Osborn, Tommy Hicks, n'akina, okhala wira ikereja khasinrowa wiiraana ni miyo. Awo aniira, "Owo onaamini nrromelo ohinimala. Owo ti muPatista. Owo khonaamini olavula ilavulelo ntoko eyooniheryo yoopacerya ya Eroho Yowarya. Mmuhiye mutth'uwo!" Munnona?

<sup>77</sup> Masi nrowe noonanane ethoni ni ethoni ni yeeyo. Noonane ni yeeyo. Awo anniwerya woonana n'aLuterano, aMetotista anniwerya. aPentekosite anniwerya woonana n'aMetotista. Miyo kinniwerya woonana n'aPentekosite ni yeeyo. Eyo ekeekhai voolikana. Eyo ekeekhai. Mwaha wa xeeni? Hiyo nineetta moWaaryani ntoko Owo siry'awe moWaaryani. Munnona? Hiyo nineetta Ephiro yuulupale ya Mwene, nto okathi enrowax'aya ottaiwene, mahala anootepa ovahiwa, owerya onootepa ovahiwa, ya wirimu enootepa ovahiwa. Nto hiyo nri vo. Ola okathi Eroho Yowarya ekhurunw'aya mwa mukhalelo wa Waarya ntoko saary'awe wopaceryani, Nlumi na Mooro, ni ohiisooniherya Mmansawe, airaka itthu sene seiyo Owo iir'awe Owo ary'ene vathi vaava. Nto Yesu iirale, "Munsuwela sayi vakhala wira aakhalana exariya wala nnari? Ni mihokorokho saya munimwaasuwela. Ole onikaamini, nave-tho onoovara miteko Miyo sinvar'aka. Ithoonyeryo iya sinimwaatthara ale anaamini."

<sup>78</sup> Vano, axinn'aka aPentekosite. Miyo kiri ni nyuwo. Miyo ka mmosa a nyuwo. Kookhalana Eroho Yowarya. Koolavula ilavulelo, masi nkiphwanye mwaha wo waakhela Eroho Yowarya. Miyo kookhalana opatiiso wa Eroho Yowarya; koolavula ilavulelo, koochimya s'eprofeta, kaahikhalana yoovaha ya osuwela, ankhili, otaphulela, ni itthu sothene siireyaka. Masi

kinniphiererya khula emosa wa itthu iyo, okhala wira vano ka mwaana a Muluku. Owerya, Mooro wa Muluku ori mmunepani mwaka; nlumi nle na Mooro naakimorenle—nookela muhina mwa miyo khupaha itthu sothene saari soovirikana ni Muluku, nto vano kineettihiwa ni Eroho Yowarya. Owo aamuwerya wira “Murowe *nno*,” nto miyo kinoorowa. “Murowe *nno*”; miyo kinoorowa. “Mulavule *va*”; miyo kinoolavula. “Ni mwiire *ela, ele, ni ekina*.” Eyo vo, ntoko paahi. . . Muneettihiwa ni Eroho. Owo ti Muluku mwa nyuwo, avaraka otthuna Wawe. Hata wira exeeni, Owo onvara otthuna Wawe.

<sup>79</sup> Vano, nwiriyane. Mukihiye koone kisome va nihinatthi opacerya sookoha mwa etaphulelo ya moolumo va. Vano, Otaphulela wa oVatikano, Mpantte 7, 190—1205:

“Ti yoorika ohimya sinto naari nsu n’atthu ale elavulaka mwa elavulelo y’okhopela; wala musukulo wala mawoowo a mwiirelo wa epheyo ele ya ikuru ya wirimu waatannyale muttitthi.”

Awo khayaawerya osuwela eyo. Vano nwehe. Nkhama yaari atthu. . .

<sup>80</sup> Kinoothoonyerya. Va nri nikhuru n’aKalileya oohaawa, oothaalelasiwa. Nto va awo arisa vate mphironi. Atthu khanatoko woona etthu ntoko yeela: matat’aya osulu, akhumanse empa ele y’osulu, khukhuruwa ixikatta iye, erowasaka iwe, oosareya paahi; awo khanlavulasa nlelo. Munnona? Awo anoorwasa va ekhuruwelaka vale. Nto vano, nrowe niire, awo yaarisa vale eveveleyasaka mwa yeela. Vano atthu khwira. . . Mukereku onikaattamela miyo ni, wira, kinnilavula eKalileya.

Nyuwo munimwaattamela ole khwira, “Vano exeeni eniwiirani, Mmiravo?”

<sup>81</sup> “Kiroosarihiwa Eroho Yowarya. Owerya wa Muluku oroomora osulu iwe mpa mme. Yookikhumelela etthu. Oh, avuwihawe Muluku!”

Nto mukina va, owo aamulavulela mutthu a wArapiya, nto owo muKalileya alavulaka Arap—elavulelo ya wArapiya.

<sup>82</sup> Vano, khanwerya ohimya, yaari epheyo ya ikuru yaakunxe murima atthu vamosa okathi muttitthi waaruuly’aya vamosa, wala waari olavula elavulelo yootikiniha awo yaalavulas’aya? Vano, Bibilia vekeekhai khoni. . . Muhaana itthu piili mukhanly’anyu oweha. Yaari. . . Ale—ale a vate khwira, “Vankhala sayi hiyo khula mutthu owiiwaka elavulelo eyareliw’ahu?” Khehimmwe wira awo yaalavula yeeyo, masi awo yaiwa yeeyo.

<sup>83</sup> Vano nikhuru nimosaru, atthu amosaru, khuleeliherya yeela. Petru khutuphela etthu khwira, “Nyuwo atthu a oKalileya, ni nyuwo munkhala oYerusalemu, musuweleke

ela (atthu ahimye wira khiyaarina elavulelo y'eKalileya) musuweleke ela ni mwiiwe masu aka (ela—elavulelo xeeni aalavulel'awe, othene ale?); vano, atthu ala khahapalasiwe ntoko sinuupuwel'anyu, woonaka wira ela ewoora ya neeraru ya nihiku, masi ela t'ile ehimmwe ni profeta Yoweli: 'Nto enimwiiraneya mahiku ookiserya, onihimya Muluku, Miyo kinimwaamwaraxela Eroho Aka atthu othene. An'inyu alopwana n'thiyana anoolavula s'eprofeta.'" Siiso arowaka, nto khwira, "Nyuwu ni matata ootakhala moomukhomela Mwaana a Muluku oohitthek'etthu. Davidi aahilavula sa Yoowo... 'khaarowa ohiya munep'Awe mookhwaani, nnakhala omuhiya Ole Oowaarya Awe wuntta.'" Nto khwira, "Musuweleke wira Yesu yoowo mmukhomenly'anyu Muluku oomukhaliha Pwiya ni Kristu." Nto awo vaiwaly'aya yeela... Amen! Aani? Khula mutthu vathi v'erimu. Exeeni yiiraneya? Owo khaahimya wira, "Vano, kinoolavula mw'Ekalileya; kinoolavula mwa *ela*; ni kinoolavula mwa *ela*...?..."

<sup>84</sup> Petru valavunly'awe moolumo ala, awo yiirale, "Alopwana n'axinna, niireke-ni wira noopowe?" Petru aahaavaha mweryo. Ti siiso eniirey'aya okathi wothene. Munnona?

<sup>85</sup> Onkhala owelaxa osulu, wiilipiha okela mwa Muluku, weetta vakhiviruxa. Munsuwela sayi? Ahe vano, okathi Lutero aakhenly'awe okhalihwa naxariya, owo aihanne yeeyo Eroho Yowarya. Yaari siiso. Muluku aarohela vakhani ya Yeeyo. Vano Owo khuhimya exeeni? Wesley aakhenle oreerihwa, khwira, "Mmiravo, mwakhuwelararu, muhaakhela." Masi anci-ene aya yaanikhuwela nave khayaarina. Okathi aPentekosite alavunly'aya ilavulelo—ilavulelo soohisuweliwa, awo khwira, "Mmiravo, mookhalana." Masi anci-ene aya khayaarina.

Khasivo itthu iyo ntoko ithoonyeryo s'osuwela eyo. "Enamuna emosa paahi munsuwel'anyu mwiri," Yesu oohimya, "enkhalala mwaha wa muhokorokho oniiim'aya," miteko sa Eroho, muhokorokho wa Eroho. Vano mwaamoonaka mutthu osareiyee owerya, osareiyee Eroho Yowarya, vano munimoona makhalelo arukunxiwe. Munimoona ithoonyeryo iya saattharaka ale anaamini: "Mwa Nsina Naka awo anoowoomola axetwani, anoolavula ilavulelo isya. Enowa yaaluma vale, kheniwiiriha ehasara. Yawurya ethu eniiva, yawurya, kheniwiiva. Yawiixaatherya matata aretta, awo anoopenuwa." Wulu! Ithoonyeryo ntoko iya sinimwaatthara ale anaamini. Masi munkela sayi mwa yeeyo? Soovaha iyo siri mw'Erutthuni. Munkela sayi mw'Erutthuni? Kahi mwaha wo olavula munkel'anyu-mo; masi mwaha wo opatisiwa mw'Erutthu emosa (aKorinto Oopacerya 12:13). Eroho emosaru hiyo othene noopatisiwa mw'Erutthu yeeyo ni ninniphiyerya soovaha sothene. Apwiya yooreeriheni.

<sup>86</sup> Vano, akhala mutthu onrowa wiiwa efiit'ela wala mutthu va ohinikupali, muupuwele, mwiire v'epatthani, munna, okhala

wira kinnoophentani.

**93. Yookoha yoopacerya ohiy'ula: Munna Branham, kinoona wira etelevisawu etthu yootakhala wa olumwenku. Munuupuwela exeeni wa yeeyo?**

<sup>87</sup> Ahe, onakhaleru pani olempe, kinrowa wiiraana ni nyuwo. Awo arookhaliha etthu yootakhala wa olumwenku. Vaamuweryaneya okhala eparakha wa olumwenku, masi awo khukhaliha etthu yootakhala. Etthu p'itthu siiso, atthu aka oophentiwa, t'ile munweh'anyu mmansinyu. Vakhala wira etelevisawu etthu yootakhala, weso exornaale ti yootakhala, weso raatiyu t'otakhala, ni imaara sinci-ene telefooni t'otakhala. Munnona, munnona, munnona, munnona? T'ile eniirih'anyu yeeyo. Masi okhalaka wira munna aahihimya ohiyu uwo, wira ti yoorika-tho okhala eprokrama mutelevisawuni; onkhala musurukhu munci-ene. Mulaleyi onilaleya Ehapari yooreera Yoomalela khonwerya oliva eprokrama mutelevisawuni. Vano tivo... Munna aahimaly'awe ohiyu uwo, kookupali, nipuro nlo, iirale, "Mmutathe raatiyu anyu," wala mutthu, wala, "Mmukumihe vanlothoni nwiriyanne iprokrama." Ti yeeyo.

<sup>88</sup> Masi, mutthu oophenteya, munakhaleru pani, vekeekhai kinniiraana ni nyuwo. Ennikhala emosa wa itthu sohonona wa nloko n'atthu. Mmo awo ankuxa musurukh'ula wothe ne wa waathuneya orowa wa kuveerunu wa mipoosito, nto anihela mmulaleeryoni wa iprokrama iya sa sikaro ni wiskhi n'itthu siiso, ni sothene iya sinkhuma mmipoositoni mwa kuveerunu; vano nto anoorwa ni waakuxa alaleyi ni waaroiha opwaroni wa milattu wira ewaakhe musurukhu vakhani awo arin'aya. Miyo kinniiraana ni nyuwo, eyo etthu yoonanara. Vano, eyo kahi... Moosuwela, eyo etthu mumphwanyanyu. Kooxukhuru, munna muthiyana, mulopwana, onakhaleru pani okohale yeeyo.

**94. Vano, va yookhala emosa yooreera. Yookoha: Aakhala mapuro mBibiliani ntoko Samuweli Oopacerya 18:10, onihimya wira eroho yootakhala yookhuma wa Muluku yaaniira itthu. Nkinsuwela saana "eroho yootakhala yookhuma wa Muluku." Xontte nkalakiheryani yeela.**

<sup>89</sup> Ahe, khino ni mukhaliheryo w'Apwiya, kinoowerya. Khenihimya wira Muluku Eroho yootakhala. Masi khula eroho ya itthu sothene enimwiiwelela Muluku. Ni Owo onikhaliha itthu sothene ovara muteko ntoko Owo sinthun'awe. Munnona?

<sup>90</sup> Vano, wa yookoha anyu, munihimya eroho yootakhala yaakhumme wa Muluku wira emuhaaxeke Sawuli. Owo aari ooriipiwa murima, mukhalelo wo—okhulumuwa, okhala wira, yoopacerya, owo aahimora. Nto okathi ommor'anyu, eroho yootakhala—Muluku onootthuniherya eroho yootakhala woohooxani.

<sup>91</sup> Kaatthuna koosomeleni etthu emosa mwa—mwa okathi. Kookhalana muupuwelo mukina va. Munnona? Khula

erooho ehaana omwiiwelela Muluku. Munnuupuwela okathi Yehoxafathi ni Akhabi yaarowas'aya okhottoni? Naanaanoru, yaahikhala—awo yaakilaathanse vamukhora. Yehoxafathi aari mutthu naxariya, nto owo khwira (mamwene owanli yaakilaathanse vale, ni yaahitakanxa ikuru saya) nto owo khwira, “Nrowe naakohe Apwiya sinto nirowe wala nnari.”

<sup>92</sup> Nto Akhabi aahirowa khwaakuxa maprofeta imiya xexe aarin'awe, othene, khwaavaha yolya khunenevasa ni sothene; awo yaarisa ni mukhalelo wooreera. Vano awo khuphiyasa iwe, nto othene aya yaahihimya ni mwiiwanano mmosa, yiiraka, “Rowakani, Muluku onimoovahani oxintta. Rowakani oRamothi w'oGalaadi nto weiwo Muluku onimoovahani etthu ene.” Mmosa aya khumpakela manyaka maili khupacerya orukurerya ntoko mooniheryo, khwira, “Ni manyaka ala maili a yuuma, munimwaakumiha elapo eyo; ti yawinyu.”

<sup>93</sup> Masi moosuwela, yookhala etthu ya mutthu a Muluku ohinikhaliherya itthu sothene iyo. Munnona? Eyo yaahilikaneke ni Soolempwa, yookhala etthu evonyeie. Khula mulipa-oowaamini eekeekhai. . . Vano Yehoxafathi aahiira, “Ahe, ale imiya xexe ankhala ntoko okhalana exariya. Ankhala ntoko atthu oophwanela.”

“Oh, ti siiso,” khino Akhabi aahihimya.

Masi Yehoxafathi khwira, “Khamurina mukina-tho?” Mukina-tho mwaha wa zeeni murine-ene imiya xexe ni mwiiwanano mmosa? Okhala wira owo aahisuwela wira yaahikhala etthu yahiiweya saana. Munnona?

Owo khwira, “Ayo, nookhalana-tho mmosa, mwaana a Yimula, nno,” khwira, “masi miyo kinnimunyokha.” Vekeekhai. Owo onootthuka ekerej'awe khula okathi ontthun'awe. Onoomoomola mmuttettheni. Munnona? Vekeekhai. “Miyu kinnimunyokha.”

“Xeeni nyuwo omunyokhaka?”

“Owo kweekwe onlaleerya itthu sootakhala mwaha wa miyo.” Kookupali wira Yehoxafathi aahisuwela vaavale vene wira yaahikhala—etthu yahaari saana.

Tivo owo khwira, “Rowani mwamuruuhe Mikaya.”

Vano awo khimurrowela, nto va owo khunarwa. . . Vano okathi aronw'aya, awo yaamurumme namuhupi khwira, “Vano, nwehererye minuutu mmosa. Vano, awo aakhalana Matotori imiya xexe a Divindad iwe. Awo t'otepexa osuwela mmuttettheni, arina Ph, LLD, n'itthu sothene.” Khwira, “Vano, moosuwela, nyuwo mutthu oohaawa oohisoma, khamunrowa waavaanyiha maphaatiri ale othene.”

<sup>94</sup> Yimula khuhimya ela, kiireke, Mikaya khuhimya ela: “Nkinrowa ohimya etthu mpakha Muluku ahele mwaano mwaka, vano nto kinoohimya siiso Owo onihimya'awe.” Okisivela

yeeyo. Okisivela yeeyo. Mwa moolumo makina, “Kinookhala ni Masu.” Voohicala etthu ale akina yaahim’aya. Owo khwira, “Ahe,” khwira, “Kinimooleelani. Mwa hitthuneke woomoliwa, vanreerela muhimye etthu emosaru.”

Tivo owo khuphiya iwe. Nto owo khwira, “Kiroweke?”

Owo khwira, “Rowakani.” Khwira, “Mukivahe ohiy’ula. Mukihiye kilavule yeeyo n’Apwiya.” Okisivela eyo. Vano ohiy’ule Apwiya yaahimukhumelela, nto mmeeloni mwaya owo khurowa. Nto owo khwira, okathi waarow’awe, owo khwira, “Rowakani; masi koomoona Isarayeli ntoko ipwittipwitthi soohikhalana makhampusi, simwaramwareiye-ene mmyaakoni.” Oh, wulu! Eyo yaahimuttiya iphumu.

Nto owo khwira, “Miyo nkoohimenryeni? Miyo kaahisuwela. Eyo t’inamuna oniir’awe okathi wothene, okihimerya etthu yootakhala.”

<sup>95</sup> Mwaha wa xeeni? Owo aakhala ni Masu. Mwaha wa xeeni? Profeta aamuhoolenle, Masu a Muluku yaakhumme mw’Eliya, profeta eekeekhai, owo khwira, “Okhala wira nyuwo muroomwaraxa ephome ya Nabothi oohittheke, alapwa anoolata ephome anyu nave.” Nto owo khimuhimeerya yootakhala ela. Elisewu iira oronwe-ene Wirimu. Masi owo aahisuwela wira Elisewu aahikhalana Masu a Muluku, tivo owo aari ni Masu. Okisivela eyo. Okhala ni Masu.

<sup>96</sup> Vakhala wira Bibilia ohimye wira Yesu Kristu mmosaru nsana, olelo, ni mahiku Othene; owerya Wawe omosaru; Eroho Yowarya ti ya khula mutthu ontthuna, arwe, akhale ni Masu. Ayo, mulopwana! Voohicala etthu akina anihim’aya. Moota anlyihw’aya saana ni ixikola kavi yeettaly’aya-wo, eyo kherina naata n’yo.

Tivo nto owo khwira . . . Mutth’ula muulupale ni manyaka vamuru wawe, arowaka okumiha—muttethe ole okhuma wa mwene, owo aahirowa khummana owanoni (mulaleyi ula mwaamukhaani). Owo aahisuwela wira aari santu mwaamukhaani oophirikeya tivo khiyaakhanle etthu yaarowa ohimmwa mwaha wa yeeyo, tivo owo aahimmana owanoni. Owo khwira, “Kintthuna kookoheni etthu emosa.” Khwira, “Mpantte xeeni eronw’aya Eroho ya Muluku okathi Eyo ekikhumaly’aya vakhala wira mookhalana?”

<sup>97</sup> Owo khwira, “Munoosuwela okathi onrow’anyu okilaathi mukalaposi ntoko nanvariwa.” Owo khwira, “Koomoona Muluku okilante-ene veehiceni (Amen! Vano nwiriyane!), vano muttitthi wa Wirimu waahithukumana omurukurenrye-ene Yoowo.” Mulattu ene waari exeenii? Profeta Awe aahimya etthu yaarowa omukhumelela Akhabi. Muluku. . . Owo khaari Eliya aahimye eyo; owo aari profeta oottikittheliwa. Awo yaari Masu a Apwiya, SIISO ANIHIMYA T’APWIYA. Nto Mikaya khwira, “Kihoona muttitthi wothene wa

Wirimu omwaattamenle Muluku waanimurukurerya mwa muthukumano muulupale. Nto awo yaanilavula mmosa ni mukhw'awe. Vano Apwiya khwira, "T'ani okhanly'ahu omurumaka okhuruwa t'ani wa nyuwo onwerya okhuruwa amootothe Akhabi, wira arowe iwe wira emaliheriwe Masu a Muluku, wira owo ahommwe? T'ani okhanly'ahu omurumaka okhuruwa?"

<sup>98</sup> Ahe, mmosa aahimya *ela* wala *ele*. Nto nuvira okathi, erooho yootakhala, erooho yoowootha khurwa ekhumaka vathi khwira, "Nyuwo mwakitthunerya-ru paahi. Miyo ka erooho yoowootha. Kinookhuruwa kikele mwa alaleyi ale othene, okhala wira awo kharina Eroho Yowarya; nto kinoowiiriha (awo amiravo ooxutthiwa oxikola paahi)—nto kinookhuruwa, kakele mwa khula mmosa a yaawo, ni kiwootothe, kaalaleerihe etthu yoowootha." Eyo yaahihimya? Nto eyo khwira, "Eyo t'inamuna enrow'ahu woottha." Vano eyo yaahikhuruwa.

Owo khwira—Muluku khwira, "Muhaana etthuniheryo Aka wira murowe."

<sup>99</sup> Nto eyo khukhuruwa khukela mwa maprofet'ale oowootha, arumeyi ooxutthiwa oxikola, khuwiiriha olaleya etthu yoowootha. Yaari erooho yoowootha yaavara otthuna wa Muluku. Mukihiye . . . Etthu emosa paahi ekina mukhanly'anyu woona va, minuutu mmosa paahi. Nwehe *ela*. Kintthuna wira mukhunle ni miyo aKorinto Oopacerya kapiitulu 5, versiikulu 1, minuutu mmosa paahi. aKorinto Oopacerya . . . Nto nwehe *ela* mwatthuna vale woona etthu, ya Muluku apakaka etthu—moota irooho iye sootakhala, moota iyo sinrow'aya—sinrow'aya weetta . . . Vareera, Paulo alavulaka:

*Vanniiwanyeya mapuro othene wira wookhala onamuttompe eriyari anyu, nto onamuttompe yoowo ohi . . . ohiniiriwe eriyari y'Amalapo, . . . (Munuupuwela exeeni wa yeeyo eriyari y'ekereja?) . . . eyo p'iyo mutthu onrupa ni mwaara a tiithi awe.*

*Nto nyuwo munnikhala oowisoona, nto hata mano . . . (Nrowe noone. Kookupali wira kikhunlale makukhu maili va . . .) . . . Nyuwo mu—Nto nyuwo munnikhala oowisoona, nto hata mano khamuriipiwe murima, mwaha . . . (Vano nwehererye minuutu mmosa va. Miyo ka . . . Ayo, ti yeeyo. Ayo.) . . . khamuriipiwe murima . . . (Ti yeeyo.) . . . oowisoona, nto hata mano . . . khamuriipiwe murima, wira mutthu oniira siiso akumihawe eriyari anyu.*

<sup>100</sup> Miyo nkisuwenle. Nkinkupali wira mutthu aamuhimya yeela wala okhottiherya, masi miyo kinikhaliherya ele enaamini aka: Akhalakhalaru mutthu asareyaka Eroho khokhanle opwetexaka Yeeyo. Munnona, munnona?



*Vano vekeekhayi, ohiya okhala ottaiwene n'erutthu, masi kiri mw'erooho, koomulamula, ntoko wira kaahikhala, mutth'uwo iirale etthu ila,*

*Mwa nsina na Pwiya Yesu Kristu, mwathukumana vale vamosa, ni erooho aka, n'uweya wa Pwiya Yesu Kristu,*

*Wira mutth'uwo avahereriwe wa Satana wira erutthu awe epweteye, ni wira erooho awe yoopowe nihiku na Pwiya Yesu.*

<sup>101</sup> Muluku, ahimeeryaka Ekereja yoowaarya, yeeyo ekhanle Erutthu Awe elapo ela ya vathi, wira (vano, ela yaari nuvira Waataana wa Khalayi, mwa Naanaano) amuhimeeryaka mutthu aari ootakhala saana eriyari y'atthu wira aarupa ni mwaara a atithi awe. Khwira, "Etthu ene eyo mw'Erutthuni mwa Kristu... Nyuwo, Ekereja, munvahererye xetwani wira apwetexiwe..." Munnona? Muluku onnitthuniherya e... Nto Owo akhalana etthu onthun'awe woona wiiriwa, owaxuxiwa mutthu, Owo onootaphula erooho yootakhala wira emuhooxe mutth'uwo ni—ni emuhokoloxe. Vano, ninnoona wira mutth'ula numala...

<sup>102</sup> Owo t'uri mulattu wa ikereja olelo. Okathi mutthu onkel'awe mw'Erutthuni ya Kristu khula mmosa w'atthu a memmo vano khunapacerya wira sootakhala, ohiya nyuwo othene otakanxana ni wira etthu emosaru yeela... Ni nyuwo Branham Tabernacle, muniira yeeyo. Okhala wira mwaamweemiheryaka, owo onkhala vathi v'Ephome. Ni owo onkhala airaka etthu emosaru yeeyo airaka, airaka, airaka okathi wothe. Muthukumane munvahererye wa xetwani wira erutthu epwetexiwe, wira erooho awe eri—ntoko—yooopowe nihiku n'Apwiya. Nto nwehe nwaxuxo wa Muluku orwa. Munwehe xetwani omuvara. Eyo erooho yootakhala enimukuxa.

<sup>103</sup> Nto mmirav'ola va aahittharuxiwa. Owo khuhokolowa. Ninnoona mwa aKorinto Aneili vaavo owo iilokiheny'awe vamaithoni va Muluku.

<sup>104</sup> Nkanweheni Yobi, mutthu ooreera murima voomalela, mutthu mmosa naxariya. Vano Muluku aahimutthuniherya xetwani ootakhala ommorela, ni omuhooxa, ni sothene sikina wira erooho awe elokihive voomalela. Munnona? Vano irooho sootakhala... Muluku onnirumeela irooho sootakhala imaara sinci-ene wira sivare muteko Awe ni otthuna Wawe.

**95.** Vano, va yookhala emosa ekhanle yoolipa saana. Yookoha (Kinoona wira mutthu mmosaru, okhala wira ankhala ntoko malepelo mamosaru): **Vakhala wira mutthu ohaana okhalana Eroho Yowarya wira akhale—okhalana Eroho Yowarya wira arukunxe murima ni wira akele mokuxiwani, t'uvi onrowa okhala mukhalelo w'anamwane akhwiye**

**ehinatthi ophiyerya iyaakha s'osuwela etthu? Ni anrowa ohihimuwa liini?**

<sup>105</sup> Vano, munn'aka mulopwana, muthiyana, nkikhanle wooleelani iyo. Khiivo Yoolempwa hata nipuro mBibiliani yeeyo kikhanly'aka ophwanyaka. Masi kinoowerya ohimya enuupuwel'aka. Vano, ela enimoolipiheryani nyuwo munaamini mahala a Muluku. Moone, mutth'ula onthhuna osuwela (yeeyo ekhanle yookoha yooreera. Munnona?) mutth'ula onthhuna osuwela ohihimuwa xeeni—exeeni enrowa omukhumelela ttutthu, vakhala wira owo ohaana okhalana Eroho Yowarya wira akele mokuxiwani...Ntoko sinihimyak'aka, ti yeeyo. Eyo eri ntoko Bibilia. Iwo wiixuttiha wa Soolempwa. Ohi ohirowa Wirimu...Okhala wira atthu oosareya Eroho Yowarya ti ohihimuwa woopacerya, ale Oothanliwa. Nto ale oohala w'ale...Anamukhwa anihala khankhala mpakha iyaakha ekonto emosa. Nuvira eMileeniyu, vano ohihimuwa wa nenli, olamuliwa wuulupale wa Veehicensi Yootteela. Munnona? Eyo vekeekhai ti ettharihelo ya Bibilia. Masi mutth'ula onthhuna osuwela anki attutthu ala. Awo...Mwa moolumo makina, awo yaahikhalana Eroho Yowarya ehinatthi oyariwa? Awo yahaakhela Yeeyo? Vano, eyo nkikhanle wooleelani.

<sup>106</sup> Masi vano, nrowe nihimye so: Hiyo noosuwela wira attutthu ankhwa, voohicala wira axitiithi aya t'ani, awo t'owoopowa. Vano, kinnivaanyiha exikola ya maprofeta wa yeeyo. Awo anihimya wira vakhala wira aari—okhwiye ni tiithi aari natampi, wira mwaan'owo onoorowa omooroni, onimuntta; onoopweteya. Ahe, Yesu...Yohani aahihimya okathi Yesu oruuly'awe, "Mmoone ola Mwapwittipwithi a Muluku ontipiha itampi sa molumwenkuni." Nto vakhala wira mwaan'owo aari mutthu, orina ovira molamulani mwa Muluku, ni Yesu ohookhwa wira attipihe itampi, itampi sothene sookumihiwa ohoolo wa Muluku okathi Yesu okhwenly'awe yeeyo. Itampi sanyu sooleveleliwa. Itampi saka sooleveleliwa. Nto enamuna emosa paahi mukhanly'anyu oleveleliwaka okupali nlevelelo Awe. Vano, ttutthu khokhanle okupaliki oleveleliwa wawe, okhala wira khiirale etthu. Owo khiirale hata etthu nnakhala. Tivo owo ori ootaphuwa wira orowe Wirimu.

<sup>107</sup> Masi nyuwo munimwiira, "Awo anoorowa mokuxiwani?" Vano—vano, nla nuulumo naka; ola muupuwelo aka vano. Muhi...Nkinwerya wooniherya ela ni Bibilia. Masi nwehe. Vakhala wira Muluku, ohinatthi opattuxiwa olumwenku, aahimusuwela khula mutthu aarowa okhala mulaponi... Munnaamini yeeyo? Owo aahisuwela khula epwilimwithi, khula eyaasu, khula epepele, Owo aahisuwela itthu sothene saarowa okhalakhala sikhalka mulaponi. Vakhala wira Owo aahisuwela eyo... .

<sup>108</sup> Nkawehani. Nrowe nimukuxe ntoko ethoonyeryo, Moise. Okathi Moise oyariw'awe, owo aari profeta.

Ohinatthi Yeremiya... Muluku aahimuleela Yeremiya, "Muhinatthi wuupeya mmirimani mw'ame anyu, muhinatthi wuupeya mmirimani, Miyo kihoosuwelani, khooreerihani, ni kihookhalihani profeta a mulaponi." Yohani Mpatisa, iyaakha imiya thanu na piili ni iyaakha muloko ni piili owo ohinatthi oyariwa, Yesaya aahimoonna mwa yoowoona, khwira, "Owo ti nsu ninkhuwela mothakoni."

<sup>109</sup> Otthoma wala osuwela wa Muluku khalayi ene onnisuwela sothene mwaha w'anamwane (munnona?), etthu yaarow'aya wira. Ni Owo aahisuwela wira yaarowa okhwa. Owo aahisuwela. Khiivo ekhanle okhumelelaka Muluku ahisuwenle yeeyo. Khiivo ekhanle okhumelelaka... Ntoko Makampusi Ooreera murima, moota Owo onkel'awe... Vano, okuxa yeela ni Soolempwa, nkaakhanle wiiraka Soolempwa sinihimya *elexe ni elexe*. Miyo kinikuxa ni muupuwelo aka.

**96.** Vano, yookoha enttharelana emosa kinoon'aka wira khino mutthu mmosa aari yeele kaahimaly'aka ohiyu uwo.  
**Mukileliherye muthiyana ootheliwa woopowa mwaha wo omuyara mwaana.**

<sup>110</sup> Muthiyana ootheliwa khanoopowa mwaha wo omuyara mwaana. Masi nrowe nimukhunle vano Timoteyo Oopacerya 2:8 minuutu mmosa paahi. Ni nrowe nisuwele etthu Bibilia onihimy'awe mwaha wa mwaana. Vano, kinnisuwela wira owo mwiixuttiho w'Ekatolika, wira aKatolika anihimya wira muthiyana onoopowa mwaha wo oyara, mwaha wo omuyara mwaana. Masi nrowe nihi... Miyo nkinaamini iyo. Timoteyo Oopacerya kapiitulu 2, nrowe nipacerye versiikulu 8, nisome okathi vakhani vano. Vaareera, nwiriyane.

*Siiso-tho, athiyana ewareke ikuwo ntoko vamphwanel'aya... (Nihikoheke yeeyo, nihaana? Nwiriyane ela)... voohuuliha muru... (Whish!)... oratteene; kahi ni otthava ikharari, wala eweero, wala maniya, wala ikuwo sooreeraxa; (Axinna, kinwehererya wira, kinnookhaliheryani va. Ixapheyo iya sothene khula nihiku wala mahiku mararu. Munnoona? Iwo kuhiyo okhala aKristu.)*

*Masi (ntoko simphwanel'aya athiyana animurumeela Muluku) ni miteko sooreera.*

*Athiyana anyu yiixuttaka ekhaleke oomaala ni wiiwelela wothene.*

*Masi nkinimuhiya muthiyana wiixuttiha, wala omuruma... mulopwana, masi okhaleke... oomaala.*

*Maana Atamu t'upacenrye opattuxiwa, nuumala khupattuxiwa Hawa.*

*...Atamu kahiyo t'otothiwe, nto muthiyana t'otothiwe khumorela mootthekani.*

*Vano muthiyana onimooopowa mwaha w'okhala maama...* (Vano, owo khonimuhimya muthiyana a molumwenkuni, okhalana aana)... owo aakhalakaru *mowaaminini...* (Munnona? Owo akhalelaru nthiti. Owo oomala... Owo ti muthiyana onimuhimya'awe, muthiyana ooponwe. Munnona?) ... *ophenta n'ureera murima ni wiisumaaliha* wothene.

<sup>111</sup> Kuhiyo okhalana mwaana animukhaliha owoopowa, masi okhala wira onaalela aana, avaraka muteko awe, kahi waalela apaakha, alapwa, ni sikina wira sikhale opuro wa mwaana, ntoko siniiras'aya olelo, envahaka ophenta wa maama wira owo aroweke ota ni weettasa ohiyu wothene. Atthu amosa-amosa aniira siiso. Wooniha othunku, masi anniira. Ti yoolipaxa wa miyo ohimya, masi ekeekhai ekeekhai. Munnona? Awo khammutthunasa mwaana wira ehiitthukeleke yoowo. Masi mwa okhalana mwaana, owo akhalela-ru nthiti waamini, oreera murima, ni wiisumaaliha wothene, onimooopowa. Masi *vakhala* wira ti, nyuwo munimooopowa nave, *vakhala* wira mooyariwa vasya. Munooowerya ovonihiwa *vakhala* wira munimwaamini. Munooowerya waakhela Eroho Yowarya *vakhala* wira munnaamini Yeeyo, mwalikana-ru wira mwaakhele. N'uwu onimooopowa athikela-ru airaka itthu seiya (munnona?), masi kahi mwaha wo wira muthiyana. Tivo ti yeeyo, munna mulopwana, muthiyana. Kuhiyo mwiixuttiho w'Ekatolika hata vakhani. Vano kintthuna... Va yookhala ekina ekhanle yoolipaxa. Vano nookhalana-tho ekina. Kinoona wira khino nihaana okathi wa yeela. Kirookuxa tu okathi ahu. Vano, iya paahi ti—iya paahi t'ikumiheryo sa muhakalaliho. Iya t'ikumiheryo sa muthukuman'ole, sookoha iya.

**97. Vano: Munna Branham** (elepwe ni maakina), **yookhala Yolempwa ya mutthu olavula ilavulelo ni otaphulela mutthak'awe mmansawe? Vaari siiso, xontte mwaataphulele. aKorinto Oopacerya wala aKorinto 14:19 nave-tho aKorinto 14:27.**

<sup>112</sup> Vaareera, nrowe nirowe mwa Yolempwa yeeyo noone etthu enihimya'aya. Vano nto nnimoona sinto ninookhaliha ela Yolempwa. Nintthuna okathi wothene nikhaleke mwa Yolempwa. Nto aKorinto 14. Vano, mutth'ula onttthuna osuwela yaakhanle-ene Yolempwa wa mutthu otaphulela mutthak'awe mmansawe olavunly'awe mwa ilavulelo. "Vaari siiso, mwaataphulele aKorinto 14:19." Nrowe noone, 14 ni 19. Vaareera, ela eri va.

*Siiso nto mukereja Ki... kintthunexa olavula moolumo mathanu n'usuwela waka, nave-tho wira kiwerye waaxuttiha akina, vahikhanle moolumo imiya miloko muloko... a... ilavulelo sihinsuweliwa.*

Vano, yootharelana eversiikulu 27, awo antthun'aya osuwela.

*Akhala mutthu onlavula elavulelo yootikiniha, elavuleke anli, wala a...araru paahi, masi vootharelana; nto akhale mutthu ontaphulela.*

113 Vano, kinkuxa ele mutthu ontthun'awe ophiyerya (yeeyo kintthun'aka—kinrowa woosomelani etthu okathi vakhani paahi). Masi kinooona wira etthu munn'ola mulopwana wala muthiyana ontthun'awe ophiyerya, “Ti yoolikana wa mutthu onlavula ilavulelo nave-tho otaphulela mutthaka ohimaly'awe?” Vano, mpatthani oophentiwa, mwasomaru paahi eversiikulu 13 ekapiitulu emosaru, enimooleelani:

*Tivo ole onlavula ilavulelo sootikiniha avekeleke wira aweryeke otaphulela.*

114 Vekeekhai. Owo onoowerya otaphulela mutthak'awe mmansawe. Vano, hiyo paahi na...Nrowe paahi...Ahe, nyuwo...Musome yothene va, munoowerya woona wira Eyo ti...Musome paahi ekapiitulu yothene. Ti yooreera saana, ennileeliherya.

115 Vano, olavula ilavulelo...Vano, niry'ene vaavo, ni ela ekaravariwaka, kintthuna kihimye wira kinnaamini olavula ilavulelo siiso ntoko kinaamini aka ovoniha wa Muluku, ni o—opatiiso wa Eroho Yowarya, orwa wanenli wa Kristu, ni owerya w'olumwenku onrwa; kinnaamini saana yeeyo ntoko sinaamini aka, masi kinnaamini wira olavula ilavulelo wookhalana opuro aya siiso ntoko orwa wa Kristu orin'aya opuro aya; ovoniha wa Muluku orin'aya opuro aya; itthu sothene sookhalana opuro aya.

116 Vano, wa nyuwo atthu, kookhalana okathi w'ohimya ela vano, ni kaatthuna kileeliherye yeeyo. Nto vakhala wira kimmutthekela mutthu, miyo nkinlakela. Nkinlakela okumiherya mutikiniho. Masi nwiriyane. Ole okhanle mulattu n'ulavula ilavulelo sootikiniha w'atthu aPentekosite (yoowo kikhanly'aka; miyo ka muPentekosite. Munnona?)...Vano, ole onkhala mulattu t'ula: wira awo khanttittimiha eyo. Nto etthu ekina, awo anoohiya tu olavuliwa khula enamuna. Awo khandthikela Masu.

117 Vano nwiriyane. Va ti vari enamuna—nrowe—va ti moota ekereja ekhalihw'aya oratteene. Vano, mukereja Pentekosite, vaakhanle wira keettiherya ekereja ela, kinimooleelani moota kaaro'wka okhaliha oratteene (munnoona?), kaakhanleru—kaakhanle va okathi wothene keettiheryaka. Miyo kaamukupali khula yoovaha mBibiliani. Waaleela alipa-oowaamini toko wira epatisiwe ni Eroho Yowarya. Vano nto, khula yoovaha ya aKorinto Oopacerya 12 yaahaana ovara muteko mukereja mwaka, vakhala wira kaamuwerya okhalana mme, erutthu yothene evaraka muteko.

118 Vano, mwaweha vale . . . Kahi okhalana miyoonelo vano. Nto muupuwele, nkaarowa ohimya nuulumo nimoso noovirikana—khino kaamuveeha Eroho Yowarya. Ni Muluku onnisuwela wira nkaarowa ohimya yoonanara eyo. Munnona? Masi kinihimya ela paahi wira kiphavele woovahani moonelo wa Soolempwa vamanly'aka osoma vano wa iyaakha soophiyaka miloko miili. Kinnikhala kilaleyaka wa iyaakha soophiyaka miloko miraru. Ni koovira mwa itthu sothene, ovira mwa sothene; munoowerya otthokelela etthu enkhalak'aya. Ni kinwehawehaka khula mutthu, ni mwiixuttiho aya, mulaponi mothene. Ni okuxa okhala wira t'ucaliwa waka. Ti yo waacala atthu okihiya miyo. Miyo kihaana okhuma mu. Nyuwo muhaana okhuma mu. Nto karowa-ru ntoko profeta oowootha, onoopweteya munep'aka n'upwetexa wawinyu ni miyo. Tivo ti yoovikana—ti yoovikana yolya ya khula nihiku; ti yoovikana osuweliwa; ti yoovikana etthu p'itthu ekina; eyo ekumii wa miyo. Munnona? Ni kintthuna okathi wothenekikhaleke vanci-enexa a xariya.

119 Vano, murowe mukereja ya Pentekosite, etthu yoopacerya . . . (nkinihimya wira othene aya. Akina aya t'a. . .) Imaara sinci-ene munoovolowa mukereja khupacerya olaleya; okathi munlaley'anyu, mutthu mmosa onoovenya n'ulavula ilavulelo. Vano, mutth'uwo oophenteya siiso akhalaka oosareya Eroho Yowarya, n'iyo pooti okhala Eroho Yowarya enlavula mwa mutth'uwo, masi etthu ene t'ila, awo khaxuttihiwe oratteene. Vakhala wira mutek'ola vaplataforma ori vathi wa muupuxeryo wa Muluku, erooho ya maprofa enemwiwelela profeta. Munnona? "Itthu sothene siiriweke . . ." Vano, mphiyе va noone mwaha Paulo ohimenry'awe wira "mutthu mmosa aalavulaka," ni siiso . . . "okathi waakenly'awe, yaari mawoowo paahi."

120 Vano, miyo kinniihanaka waltaari, nto mutthu onoovenya n'ulavula ilavulelo. Eyo paahi . . . Ahe, vaareerela ohiyererya wiihana waltaari. Onimweemexa. Munnona?

121 Vano nto, etthu ekina. Imaara sinci-ene atthu anoovenya n'ulavula ilavulelo, ni atthu anookilaathi n'unyamunya ixuwinka, ewehawehaka mapuro othene. Muluku aalavulaka, mukhaleke oomaala, nwiriyaneke! Yaary'ene Ekeekhai, yaary'ene Eroho Yowarya enlavula mwa mutth'uwo, mukhale oomaala nto nwiriyane, mukhale ootittimiha. Otaphuleliwa pooti woorweelani nyuwo. Munnona? Mukhale oomaala; nwiriyane otaphuleliwa. Vano, aahikhale hata mutaphuleli mukereja, vano vanthuneya ekurunuxe murima mw'Erutthuni.

122 Vano nto, awo yalavula elavulelo yootikiniha, Bibilia ohimye wira, yiilavuleleke mmansaya awo ni Muluku. Ole onlavula ilavulelo sootikiniha onilipiha mmansawe. Vano, iyo ilavulelo sootikiniha; mattaava, malavulelo ti yoovirikana. "Iyo khasihiyo etthu," owo onihimya . . . Masi khula nsu nookhala etthu nihimiy'aya. Masi nyuwo . . . Nlope naruma, muhaana osuwela etthu ninrumih'aya ( . . . orumiha paahi) ahiiso

khamunrowa osuwela moota wo wiitthokiherya ekhotto. Akhala mutthu alavulaka ilavulelo, ni wira paahi “tuut”; ti yeeyo tu ekhanle wa yeeyo, t’ani onsuwela etthu yo wira. Masi narumaru *nlope n’antoropa*, nlo nnihimya “nvenye!” Narumiharu *ohala*, nlo nnihimya “wuurama.” Munnona? Narumiharu *woopa* nlo nnihimya “woopa.” Nihaana ohimya etthu, nto kahi olavulasa tu mmansaya. Siiso mukereja, aahikhale mutaphuleli, masi akhala mutaphuleli, nto ilavulelo ti sa mukereja.

<sup>123</sup> Vano, wa yookoha anyu, mpatthani oophentiwa, enihimya, “Kaamutthuna olavula ikonto thanu...moolumo mathanu n’usuwela, ni wira athu eweryeke okiwa saana ehikhanle imiya miloko mithanu (wala othene anihimya) mwa elavulelo yootikiniha.” Eyo ekeekhahi. Masi musome murowaka vathi: “. . .voohikhala mwa wuupululiwa wala otaphuleliwa wira nilipihe.” Munnona? Olipiha.

<sup>124</sup> Vano, miyo kinoovahani nlikanyiho nikhaani ankh—ankhi. . .Vaakhanle wira kaari pastore a ekerej’ela enikhumelela, vaakhanle wira Muluku aamukiitthana wira keettiherye, ela t’inamuna kaarow’aka wira: Kaamphavela omphwanya khula mutthu mmo orina yoovaha. Nto kaamwaathukumaniha athu awo ewoora ntero muteko ohinatthi opacerya, musaala yaaworu. Ni waahiya okhala vathi va Eroho. Nto naanaanoru, mmosa onoorwa, orina yoovaha y’olavula ilavulelo. Nto owo aamulavula ilavulelo. Athu othene yaamukhala oomaala. Vano nto mmosa aanvenya ataphulele etthu owo onihimya’awe. Vano, eyo ehinatthi ovahereriwa ekereja, Bibilia onihimya wira ehaana ophukiwa n’anamoona aili wala araru. Vano, owo ti mutthu orina othokorerya wa eroho (munnona?), okhala wira imaara sinci-ene ikuru sootakhala sinnikela mmo. (Munnona?) Paulo oohimya eyo. Masi nto, owerya wa Muluku ori memmo nave-tho. Mukileele muthukumano mmosa vaavo otakhala ohinkhal’aya-vo. Mukileele nipuro aana a Muluku anthukuman’aya vamosa Satana ohinkhal’awe eriyari aya. Ti itthu sothene. Tivo muhinyoonyeye ni yeeyo. Munnona? Satana onnikhala mapuro othene. Vano, ela va. Mutthu onlavula ilavulelo. Vano, aakhala araru amphwanyaneya vo arina Eroho y’othokorerya. Nto mmosa onoolavula ilavulelo n’ukumiherya mutthaka. Vano, khekhanle ohimya Soolempwa, okhala wira Muluku khontthikela moolumo mamosaru, ni Owo onihimenrye wira nihiireke. Munnona? Tivo kehiyo yeeyo. Owo mutthaka wa ekereja.

<sup>125</sup> Mpakha va ninnikhalanaka itthu piili mwa muhakalalih’ola. Nwehe moota khula emosa wa seiyo yaary’aya—yoolikana, oratteene. Munnona? Erookela. Mutthu mmosa aaroovenya, khulavula ilavulelo, khuvaha otaphulela, nto khutthikela ottuli, khulipiherya mutthak’owo waamanle okhuma. Mukina khuvenya ohiyu mukina, kuhimya mwa—ni muupuxeryo w’eprofeta, kuhimya etthu, ahisuwelaka etthu aahimya’awe;

vano nto woomalelani owo khuhimya, “Ooreeriwa t’ule onrwa ni Nsina n’Apwiya.” Voohipisa etthu emosa khukivara naanaanoru khwira, “Ni moolumo makina ooreeriwa t’ule onaamini wira ala t’Apwiya arwiye.”

<sup>126</sup> Moone naanaanoru—vano Eroho Yowarya yaahikhuruwela mpaani nsana ohiyu. Munnona? Eyo ti ya olipiha. Miyo keemenle vale kiphavelaka waaleela atthu wira ahaana waakhela Eroho Yowarya. Vano xetwani aahikela eriyari y’atthu, iiraka, “Muhiwiriyane; mukhale oomaala tu.”

Murokor’aka khwira, “Bill, nkaareere otteeliwa murima okathi mwaalaley’anyu; kaanoona ntoko kaaniwerya ovenya n’utupha ophova exiri.”

Miyo khwira, “Nvenye mutuphe.” Ti yeeyo tu.

Nto owo khwira, “Masi vapaceny’anyu wira siiso,” nto khwira, “atthu yaahipacerya okhuwela,” khwira, “vano kaahiisoona wira nkaari etthu.”

<sup>127</sup> Miyo khwira, “Owo ti xetwani. Owo ti Satana. Vakenly’awe wira aire siiso,” Miyo khwira, “mwaahaana ovenya khula enamuna.” Hiyo n’anamukuttho wa Muluku, ninvaha mukuttho wa erooho—mukuttho, mihokorokho sa moolumo ahu anttotopela Nsina Nawe. Munnona?

<sup>128</sup> Vano, vano, ela t’ile yaakhumelenle. Nto Eroho Yowarya yaahikela, okhala wira yaari paahi... “Ooreeriwa t’ule onaamini.” Ohiyu, miili miraru woottharana kaahiphavela okeliha yeeyo mme; vano nto, Eroho Yowarya khulavula khwira (vathi va muupuxeryo) khwira, “Attotopeliwe ole onrwa ni Nsina n’Apwiya.” Nto kihinatthi ohimya etthu, kaahitthikela ohimya. “Ooreeriwa t’ule onaamini wira Apwiya ahoorwa mwa yeela.” Munnona? Ni miyo kaahikhala kihimya yeela, Eroho Yowarya ti Muluku Mwaneene mwa nyuwo. Munnona? Vano awo yaanivara eyo. Munnona? Vano nto Eroho Yowarya yaahikhuruwela eriyari y’atthu. Munnoona moota Eyo—Eyo enlipihaaya, elaleeriwo y’eprofeta?

<sup>129</sup> Vano, wookhala ovirikana wa elaleeriwo y’eprofeta ni profeta. Eprofeta ennivira okhuma mwa mmosa ekelaka mwa mukina, masi profeta onooyariwa okhuma enamwana profeta. Awo ankhalana SIISO ANIHIMYA T’APWIYA! Khuuvo olamuliwa w’awo. Nyuwo khamuniwoona awo weemela ohoolo wa Yesaya, wala Yerehiya, hata mmosa a maprofet’awo, okhala wira awo yaarinasa SIISO ANIHIMYA T’APWIYA! Masi erooho y’oprofeta eriyari y’atthu; muhaana oweha saana eyo, okhala wira Satana onimwiikelihla mme. Munnona? Vano. Masi ehaana olamuliwa.

<sup>130</sup> Vano, hiyo ni—ninrowa okhalana muhakalaliho. Vano, nwehe ela saana vano, nyuwo arumeyi. Nintthokiha muhakalaliho. Vaareera. Wala khino ninookhalana muteko wa mukereja voolimaleleya. Ekereja envarela mooro. Yaahaana okhala okathi



wothene. Ahe, khino ninookhalana atthu athanu wala athanu na mosa akhalanne yoovaha; mmosa onlavula ilavulelo, aili wala araru khino anlavula ilavulelo, axexe wala athanu n'ilavulelo, arina yoovaha ya ilavulelo, anlavula ilavulelo sootikiniha. Aili wala araru anwerya otaphulela. Khino ookhala mmosa—aili, wala araru aya arina soovaha s'ankhili. Vaareera. Othene aya anookumana, atthu arina soovaha... Nyuwo... Soovaha iyo munoovahiwa kahi wira muthweelaneke, kahi wira, "Avuwihwe Muluku, kinnilavula ilavulelo! Aleluya!" Muni—muni—munimwiihonona mmansinyu. Iyo, munivahiwa wira nvaraneke muteko. Nto mpantte anyu mukereja waahaana orwa muteko ohinatthi opacerya, okhala wira ale oohisuwela anrowa okhala eriyari ahu.

<sup>131</sup> Vano munoovolowa musaala, khukilaathi memmo, nyuwo atthu vamosa, okhala wira nyuwo mw'anamakhaliherya muteko mwa Ehapari yooreera. Vano munookilaathi vo. "Pwiya, yookhala etthu Nyuwo munthun'anyu wira nisuwele ohiy'ula? Mulavale ni hiyo, oh, Tithi a wirimu," nvahererya mavekelo, oxontela; wiipa masipo. Naanaanoru Eroho enookhurwa, enommorela mutthu, onoolavula ilavulelo. Mmosa onoovenya ni wira, "SIISO ANIHIMYA T'APWIYA." Exeeni iyo? Nwiriya. "Murowe mwamuleele Munna Jones akhume empa onkhal'awe, okhala wira meelo oxekuwa onookhala mwanankhaya onrowa oruma elapo ele; nto onoorowa okuxa emp'awe. Akuxe mireerelo sawe athaame!"

<sup>132</sup> Vano, eyo—eyo enniweya oratteene. Masi nwehererye vakhani. Ahaana okhala atthu araru vale arina Eroho y'olamula. Mmosa aya oniira, "Yaari y'Apwiya." Mukina oniira, "Yaari y'Apwiya." Awo aili w'araru—anamoono aili w'araru. Vaareera. Awo anoolepa eyo vapapheloni. Ti yeeyo Eroho ehimaly'aya. Vaareera. Awo anootthikela ovekela, yaaxukhuruku Apwiya.

<sup>133</sup> N'uvira okathi vakhani, "SIISO ANIHIMYA T'APWIYA (profeta onoovenya) SIISO ANIHIMYA T'APWIYA, ohiy'ula, onookhala muthiyana onkhuma epooma ya Nova Yorke; owo ori vanrepani; onoorowa okela mpaani ory'ene vanrepani. Ookhalana nleso nooripelela mmurini mwawe. Owo onookhwa mwaha wa kankuru. Etthu emukhalinhe siisa, Apwiya aakhalana mulattu n'owo—emaara emosa owo aarimwiya musurukhu muKereja mw'Aya okathi waarin'awe iyaakha muloko ni thanu na mosa. Mmuleele Munna Branham wira amuhimeerye itthu iya. SIISO ANIHIMYA T'APWIYA, owo alokiharu etthu iyo, onoonihiwa." Nwehererye vakhani. Eyo enniweya vooreera masi nwehererye vakhani. Munoorowa ohela nsina nanyu vapapheloni va, namalamula? Munoorowa ohela nsina nanyu?

<sup>134</sup> "Vakhala wira yaari y'Apwiya." Mmosa khuhimya, "Yaari y'Apwiya." Vano—vano nyuwo mulepe, "SIISO ANIHIMYA T'APWIYA, olelo ohiyu onookhala muthiyana onrowa orwa, sa

ni *sa*.” Ole orina erooho y’olamula, aili wala araru aya alepe masin’aya vaavo. Mitthaka iya sothene soovahiwa. Vaareera.

<sup>135</sup> Vano nuvera okathi anipacerya wiiwa esimpi oruma. Ekereja enrowa opacerya muteko. Vano awo anooruaha mitthaka iya, anoopweha vapulpitu va. Vaava ti nipuro vantthuneya opwehiwa. Miyo kiry’ene nipuro nlo kisomaka, kilompaka. Nuvera okathi vakhani kinookela vammal’aya wiipiwa masipo. Ekereja ti yoolikane-ene, atthu aavolowa, aakilaathi, etthokelelaka, evekelaka; ti yeeyo entthuneya nyuwo wira. Kahiyo orwa okereja n’ulavula mmosa ni mukhw’awe, murweeke okereja olavula ni Muluku. Mukhalaneke opatthana wanyu vate vale. Munnona? Hiyo nimpatthana ni Muluku vano. Ni ninvolowa mu nilavulaka, sothene voomaaleleya, ni nttittimiho, Eroho yeeteetaka. Mulipa a piyaano onoorwa vapiyaanoni ntoko minuutu mithanu muteko wa masipo ohinatthi opacerya, khupacerya orumiha voomaala:

Vathi vamwikimanyo vaavo Moopoli aka  
okhwiw’awe,  
Vaavo kaahivekela orapihiwa itampi, . . .

Wala nsipo nimosa nooreera noosivela, voomaaleleya saana. Eyo enniruaha Mukhalelo wa Eroho Yowarya vamuthukumanoni. Munnona? Vaareera.

<sup>136</sup> Atthu akinlathe vale. Amosa-amosa a awo t’o—anoopacerya wunla n’urwa waltaari, orukunxa murima muteko ohinatthi hata opacerya. Eroho Yowarya eri vale. Munnona? Ekereja enoona owereya w’oyara. aKristu anoovekela; awo ankhalala voopuroni vaya. Awo khakilanthe vale enyamunyaka exuwinka, yiiraka, “Eyi, Liddie, kivaheni epato anyu vakhani; Kintthuna . . . Moosuwela. Moosuwela. Kimphavela . . . Moosuwela, nihiku nle okathi waary’aka kithumaka itthu, kinooleelani, kaahala wookwattulani. Vakhala wira kootoko woona eyo . . . Munuupuwelela exeeni yeeyo?” Oh, ikharari! Ni wiihana eyo empa ya Muluku. Vano, iwo otakhaliwa. Erutthu ya Kristu enoothukumana. Vale ninookilaathi.

Mutthu okilanthe vakhiviru, “Oniira, moosuwela okathi waaronw’ahu iwe, *lexe ni lexe* ola ni *lexi ni lexe ni lexe* . . .” Eyo eri saana ota iwo, masi mu mpaani mwa Muluku.

<sup>137</sup> Nvolowe nvekelaka; mukhale voopuroni vanyu. Kinlavula vano, kahi n’ikereja sanyu, axinna. Miyo nkinsuwela etthu eniir’anyu; miyo kinlavula n’itapernakulu ila. Miyo kinlavula n’ale kikhanly’aka waakhula mwaha wa yaawo. Munnona? Ti yeeyo.

<sup>138</sup> Vano, nyuwo mwakela-ru siiso, nto naanaanoru, pastore onookhuma. Owo ori oomumule-ene. Owo khorina waakhula *ela, ele*, ni *ekina*. Owo onikhuma v’o—v’okameni va muteko awe. Owo ori vathi va owerya wa Eroho Yowarya. Owo onvolowa nipuro malumi manci-ene a mooro athukumann’aya vamosa.

Vano nlo nłumi nimoso vano (munnona?), nlo nnimweetteetta. Owo onoorwa va, onookuxa ela. “Mutthaka onikhuma mukereja: ‘SIISO ANIHIMYA T’APWIYA, Munna Jones akhume owannyawe. Meelo oxekuwa iwoora piili mwanankhaya onoonona mutheerye awe. Akuxe itthu sawe akhume.’” Munna Jones onimwiiwa eyo. Vaareera. Eyo yoolempwa. “SIISO ANIHIMYA T’APWIYA, onookhala muthiyana oniihaniwa *Lexe ni lexe* onrowa orwa va olelo ohiyu, ni aari—owo orimwiira *elexe n’ilexe*.” (Ntoko simanly’aka ohimya, moone, siiso.) Vaareera, eyo eri vale. Ti yeeyo. Iyo soophwanyanya opuro aya vano mukereja. Vaareera.

<sup>139</sup> Vano onookuxa mutthaka. Naanaanoru, onoopacerya olaleya. Khiivo eri wira ewateerihe; woomala wiiraneya. Vano, ninrowa ohoolo, ninoolaleya mutthaka ene.

<sup>140</sup> Nto nuvira okathi vakhani okathi e...Naanaanoru mutthaka omalaka-ru, eliinya ya ovoniha enoopacerya. Va onoorwa muthiyana. Mutthu mmosa aahilavula ilavulelo khuhimya wira aamoowa. Munnona? Khula mmosa a hiyo oosuwela etthu enrowa okhumelela. Khula mmosa a hiyo oosuwela. Moone moota waamini onipacery’aya olipihereya ni malumi awo a mooro ari vasulu vanyu vano. Nlo nnoopacerya opakeya. Vano, owo muteko omalihiwe; ti yeeyo tu.

Muthiyany’owo...Kinimwiira, “Muhano *Lexe ni lexe*, onikhuma Epooma y’oNova Yorke, okilanthe va...” Munnona?

“Oh, eyo ekeekhaii. Musuwenle sayi yeeyo?”

“Owo mutthaka okhumme w’Apwiya wa ekereja. Okathi waary’anyu iyaakha muloko ni thanu na mosa, khimwaari nipuro *khata ni khata* khwira—khukuxa musurukhu wa ekereja, khwiiya, khurowa, khuthuma ikuwo isya ni yoowo?”

“Oh, eyo ekeekhaii. Eyo ekeekhaii.”

“Ti yeeyo vekeekhai Muluku onihimenry’awe ohiy’ula mwa Munna *Lexe ni lexe*, aalavunle ilavulelo; Munna *Lexe ni lexe* khutaphulela; Munna *Lexe ni lexe* va khuhimya, mwa olamula, khuhimya wira waari w’Apwiya. Nto eyo ekeekhaii.”

“Ayo!”

“Vano, SIISO ANIHIMYA T’APWIYA, murowe mwalokiherye, nto munoopenuwa kankuru anyu.”

<sup>141</sup> Munna Jones onoorowa owannyawe, akuxe ivakawu, atthike, akuxe ikaruma sawe sa mpaani, akhume vale. Iwoora piili meelo oxekuwa: Zowie! Etthu yothene enoolakaseya. Munnona? Vano ekereja enoovuwiha... “Nooxukhuru, Pwiya Yesu, mwaha w’oreera Wanyu murima.” Vano, ti yeeyo ekhalenly’aya, wira elipiheke, ekereja.

<sup>142</sup> Vano, ankhi yaahikhumelele awo numala ohimya? Weso mookhalana erooho yootakhala eriyari anyu. Nyuwo khamuntthuna etthu iyo yootakhala. Xeeni otthunaka etthu

yootakhala osu—osulu osareiyene Pentekosite eekeekhai? Muhikuxe yoorantela ya khalayi ya xetwani. Mukuxe etthu y'ekeekhai. Muluku ookhalana wa nyuwo. Vano muhikhalane-tho mithukumano, ni muhihele etthu vasulu va, mpakha Muluku alipherye wira muri saana, okhala wira nyuwo mwa mulipa-ookhaliherya a ekereja mmutekoni wa Ehapari yooreera. Vano, munnisuwela saana etthu ekhanly'aya?

143 Vano ilavulelo, ilavulelo sootikiniha...Khaavo ole—onsuwela etthu onihimy'awe. Owo onoolavula; masi khula nsu yookhala nihimy'aya. Eyo yookhala enihimy'aya [Munna Branham onooa ikuphi—Mol.] “Glack, glack, glack!” Eyo yookhalana—eyo e—nlo ntaava nipuro nlo.

144 Okathi waary'aka wAfrika, nkinatoko waamini, masi khul'etthu yaanyakula yaahikhalana etthu yaahimy'aya. Bibilia ohimye wira khanivo nsu nihinihimya etthu, nihirina y'ohimya. Khula nsu ninruma nookhala nihimy'aya wa etthu. Vano, kaaniwiwa atthu wira...Kaamwiira, “Yesu Kristu, Mwaana a Muluku.”

145 Mmosa aya aamwiira [Munna Branham ontakiherya nsu na mutaphuleli mmosa a wAfrika—Mol.]. Mukina aamwiira [Munna Branham onnooniherya-tho.]. Nto eyo yaari, “Yesu Kristu, Mwaana a Muluku.” Munnona? Yaanikhalana e...Khiyaahimya etthu wa miyo, masi w'awo naari ntaava siiso ntoko sinlavul'aka ni nyuwo. Okathi mutaphuleli a eZulu, eXhosa, eBasutu, ni sothene sikina, yaakhalas'aya vale, khula emosa yaahimmwa, othene yaaniwa. Nto itthu iya siniwiw'anyu atthu elavulasaka voohiloka, ni wupuwela wira okwakwaruwa mwaano wowaatta, kuhiyo; yookhala enihimy'aya. Tivo hiyo nihaana ottittimiha, ohela vooপুরoni vaya.

146 Vano, khino siiso ohikhanle hata mutthaka. Vano, muteko woomala; wiihana waltaari onimwiiriwa. Nto okathi vakhani mutthu (khuhikhala mutthaka vo) mutthu onoovenya vowaakuva sinwery'awe. Eroho Yowarya...Vano, Bibilia oohimya, “Aahikhale mutaphuleli, owo amaale.” Hata wira onthuneyaxa olavula sayi, mmaale.

147 Muniira, “Nkinwerya.” Bibilia ohimye wira mwaamuwerya. Munnona? Tivo eyo—eyo ennimaliha mwaha. Munnona? Owo amaale.

148 Nto, okathi, onimoorwa okathi sothene sinrow'aya okhala oratteene, nto Eroho Yowarya yammorela wira owo ahimye mutthaka, vano ahimyeke. Ti yeeyo vekeekhai murin'anyu wira. Vano otaphulela onimoorwa, wira, “Ookhala muthiyana mmosa va onihaniwa Sally Jones (kinroromela wira khokhanle va muthiyana orina nsina nenlo, masi... ) Sally Jones. (Munnona?) Mmuleele wira ola p'uhiyu wookiserya wo wiihaniwa wawe. Aikhalihe oratteene ni Muluku okhala wira orina okathi vakhani

w'okhala va.” Vano, Sally Jones onoothimakela waltaari voowaakuva ntoko sinwery'awe ophiya vale (munnona?), okhala wira iwo ti wiihaniwa wawe wookiserya. Munnona? Iwo p'uhimya mutthaka, wala mulipiheryo, wala etthu.

<sup>149</sup> Eyo t'ikereja ya Pentekosite evaraka muteko. Khuuvo hata oweryaneya wa irooho sootakhala okela, okhala wira yoomala...Bibilia onnihimya oratteene, “Ekhaleke vootharelana, ni eyo n'atthu araru; aili wala araru elamule.” Eyo ti ekereja. Masi hiyo nrina exeeni olelo? Otupha, evitika-vitika, otheya ni wiirasa itthu okathi mutthu onlavul'awe ilavulelo; mukina owehaka, alavulaka etthu ekina n'uthukumana nipuro; pastore airaka etthu; wala atthu ethukumanaka nipuro nlo. Ahe, eyo kahi yooreera. Khino pastore onoolaleerya, nto mutthu mmosa onoovenya n'umutepanya va...Khino amusomaka Bibilia nto mutthu mmosa...Amusomaka Bibilia, nto mutthu mmosa ottuli iwe alavulaka ilavulelo. Oh, nnari! Munnona? Khino mulaleyi alaleyaka vapulpitu, mutthu mmosa onoovenya n'umutepanya, alavulaka ilavulelo. Vaareera. Nkinihimya wira kehiyo Eroho Yowarya, masi mwaahaana osuwela moota w'orumeela Eroho Yowarya (munnona?), wira murumeele.

Vano, miyo—miyo kinkuxa...Muhaana opuro wa emosa tho? Vano, meelo Ttiminkuu. Vano, ninoo...Nrowe paahi...Yookhala emosa va. Kinoona wira ti yootepa oreera. Nto vano, nyuwo othene mwavilela-ru ni miyo minuutu vakhani-tho, xontte. Vano nto, kinoo...kintthuna nyuwo—kintthuna wira mwiiwe saana ela. Kiroosuka ela mwayiini. Ela ti yookiserya aka.

Vano, toko, kinrowa osoma itthu piili mutth'uwo okonh'awe. Eri vapapheloni ya khalayi, elempwe ni elepeliwo yooreera. Nkinuupuwelela wira ti pani, hata nsina khanilempwe—wa hata emosa wa seiyo.

**98. Munna Branham, ti yoolikana arumeyi okhaliha otumererya vanci-ene w'ovekela musurukhu mmitekoni mwaya m'olaleerya, chimyaka wira Muluku orimwaaleela wira atthu anci-ene vamuthukumanoni ahaana ovaha khata? Yaakhanle-ene yoolikana, kintthuna kisuwele. Wala yaakhanle-ene yoovonyeya, kintthuna kisuwele. Ela khereere okikattiyamiha vootepaxa.**

<sup>150</sup> Vano, moone, mpatthani, kinrowa wooleelani, kinrowa wooleelani ele enuupuwel'aka. Munnona? Vano, eyo khenihimya wira eri saana. Kinoona wira ti yoowooipiha.

<sup>151</sup> Vano, miyo kinuupuwela ela. Muluku ookiruma vapuwani. Kaahipherya okathi kiisoon'aka ntoko kaarowa okhala mano...Ni miyo—miyo nkaarina musurukhu nnakhala. Nto kaamwiira, “Nvirihe muhasa wa soovaha tu.”

Nto mulipa-ootthokiha aamukirweela ni wira, “Nkawehani, Billy, sinninhaleela itoolare ikonto thanu ohiy’ula, mmiravo. Muhaana musurukhu ene oJeffersonville w’oliva?”

<sup>152</sup> Miyo kaamwiira, “Sothene sinookhala saana. Muluku okirumme wenzo, ahiiso nkaarowa orwa. (Munnona?) Nvirihe muhasa wa soovaha paahi.”

Nto muteko ohinatthi omala, mutthu aamwiira, “Moosuwela, Apwiya aroohela vamurimani vaka wira kivahe itoolare ikonto thanu.” Munnona, munnona? Yoopacerya, mukhale ooweettitheriwa wira mwiire.

<sup>153</sup> Miyo nkinaamini oroka, ni oveka, ni ovekaveka musurukhu. Kinoona wira etthu yoonanara. Vano, munna, mwairaka siiso, nkinthuna woosikulihani. Munnona? Nyuwo—siiso nyuwo murina-ene ehaakhi wa Muluku wira mwiireke. Masi kinlavula mwaha wa yoomi. Miyo nkinaamini iyo.

<sup>154</sup> Vano, hata kinnaasuwela arumeyi anrowa ni wira. . . Miyo kaari iwe, kahi khalayi. . . Vano, ela khiyaari aPentekosite, ela ti. . . Ahe, saari khelayi, (munnona?), ikereja sikina. Miyo kaari vamuthukumanoni muulupalex. Gertie, nyuwo mwaari ni miyo, anci-ene akina ari va. Nto awo yaahikhala oxekuwa wothene muromolelo mmosa woosuweliwa—miili wala miraru vamosa (iyo ikereja sene, ntoko ikereja sahu sa vano mpooma mu, ni siiso) vamuthukumanoni muulupale—nto awo yaanikhala oxekuwa wothene, yeemenle-ene vaplataforma—yoopopihaka wira Muluk’uwo aamuhonona soolima saya, wira aamwaaruuhela an’aya eretta y’osupiwa, n’itthu siiso, yaahihele-ru etthu vamuthukumanoni vale. Eyo ekeekhai voolikana, ni Bibilia ola ohoolo waka. Miyo khwira, “Ti yo onveeha Muluku ni anammuthara Awe.” Vakhala wira Muluku ohooruman, Owo onimookhapelelani. Owo aahoorumeni, weso muhiye muromolelo wookhapelelani nto. Masi—masi nyuwo. . . Muluku ooruman-ru, Owo onimookhapelelani.

### **99. Ankhi othweela wa niira na Natale mukereja emosa ya Eroho Yowarya?**

<sup>155</sup> Ahe, wakhala-ru mwaha wa Kristu, pooti okhala saana. Masi wakhala-ru mwaha wa Paapa Noweli, miyo nkinimwaamini. Miyo—miyo kihinnuwa—kihinnuwa w’ohaamini iyo. Miyo nkinimwaamini Paapa Noweli hata vakhani. Munnona? Ni itthu kamosa-kamosa iya sikhaani sa Natale awo ankhalan’aya, kinoona wira ti s’ethiru. Ni. . . Masi kinoona wira awo aroomukumihha Kristu othene mwa Natale khunhela Paapa Noweli memmo.

<sup>156</sup> Nto Paapa Noweli ehantisi yoowoothiwa. (Kinroromela wira, nkinoosikulihani, mwaha w’anamwane.) Masi kinimoolelani. Nno woohikhala khalayi, wa iyaakha soophiyaka, miloko miili ni thanu, miloko miraru okathi murumeyi mmosa epooma ela, pastore a—a ekereja emosa

yuulupale nno mpooma, yoowo kaamusuwel'aka saana, mpatthani aka a vatthirima, owo aahikirweela. Ni Charlie Bohannon (Munna Mike, munnimuupuwela Charlie Bohannon, mpatthani aka ooreera murima)... Okilante-ene vale muskritooryu mwawe iirale, "Nkinkhalakhala kaahimeeryakatho an'aka wala axisuulu aka etthu ile yowoothiwa." Owo khwira, "Mwan'aka mmiravo aahikirweela waamanly'awe okhalana iyaakha soophiyaka muloko ni piili, alavulaka mwaha wa Paapa Noweli..." Nto owo, khwira, "Xeeni... Oophentiwa, kihaana etthu wira kooleleni," Khwira, "Ame anyu..." Moosuwela, khukelela ohoolo amuleelaka saamuleel'awe.

Vano vatthikaly'awe, khwira, "Nto, Paapa, Yes'ula etthu emosaru?"

<sup>157</sup> Muhimye ekeekhai. Paapa Noweli ethiru y'eKatolika enimuhimya mutthu mmosa, Kriss Kringle wala Nikolawu Oowaarya, santu mmosa muKatolika a wAlemaanya a iyaakha sinci-ene sivinre aarowaka nno ni nno awiirelaka sooreera anamwane. Nto awo aakhaliha ntoko elimalelo. Masi Yesu Kristu ti Mwaana a Muluku. Owo t'ekeekhai, ni Owo mukumii.

Vano, yookhala yookoha va, yookiserya, ekhanle yo...

<sup>158</sup> Vano nkawehani. Nyuwo pooti ohikeemererya mwa yeeyo. Masi mwaahikeemererye, muupuwele, ekhale voopathhani, munimwiira? Miyo kinnoophentani, ni nkinthuna o-nkinthuna woosikulihani. Miyo paahi, kintthuna okhala naxariya. Kaahiwerye... kamuleela etthu yoowootha mwan'aka, nto ka nawoothe. Munnona? Kintthuna kimuleele ekeekhai.

<sup>159</sup> Vano, kinoomuleela sa Paapa Noweli, kinimwiira, "Ayo, tthiri, ookhala Paapa Noweli. Onnaathotola Atiithi ohiyu wa Natale." Munnona? Ayo.

<sup>160</sup> Moosuwela, nihiku nlo miyo kaari iwe, kaaheererya yeeyo ni mwaana mwamuthiyana mmosa wira koone tu. Vekeekhai kaahiliva voolipa musuri. Kaari mpaani. N'awo yaarisa weiwe, ohitto nno oQuaker Maid. Nto miyo kaaronwe weiwe othuma yolya. Vano nto hiyo, amwaar'aka ni miyo, naari memme. Nto aahikhala mwanamwane mwamuthiyana, ahaarina miyeeri soovikana muloko ni mithanu na miraru, nto owo aari vale, arowaka, aipaka, "Isimpi Sinruma, Isimpi Sinruma..." Nto miyo khwira... Vakarinyoni vawe ekhaani, moosuwela, okilante-ene ottuli w'ekarinyo ekhaani.

Miyo khwira, "Munimphavela Paapa Noweli?"

Owo khwira, "Ale t'atithi aka, Mwenye."

Miyo khwira, "Oreerihwe murim'anyu mwamukhaani, Oophentiwa. Muhaana ankhili."

Vano, va eri yoorika, apatthani. Nto mwa yeela... Vano kinoomaliha. Oh, ti—ti Yoolempwa yuulupalexa, masi enkhala

ntoko yoorika wa khula mutthu. Ni miyo yaanikirikela mwa iyaakha n'yaakha; nto paahi ni mahala a Muluku... Nto amwaar'aka oophwanelaxa, akilante ottuli iwo vano, vaiwaly'aya wira kaahikhalana yookoha eyo oxekuw'ola, awo yiirale, "Bill, munrowa waakhula sayi yeeyo?" Awo yiirale, "Miyo kweekwe kinniikohaka yeeyo mmansaka." Khwira, "Nkinatoko osuwela saana." Nto khwira...

Miyo khwira, "Murwe olelo ohiyu, Oophentiwa. Kinimwiira voowerya waka ni mukhaliheryo wa Muluku."

**100. Munna Branham, xontte munileeliherye aHeperi 6:4 mpakha 6.**

<sup>161</sup> Owo p'ukathi mmosa vekeekhai... Moone, vano muhaana wiiwa saana va wa waamini wahu, mahala, olipa w'alipa-oowaamini, nthiti n'alipa-oowaarya, nthiti, kiireke, n'alipa-oowaarya. aHeperi kapiitulu 6, 4 mpakha 6.

Vano, naanaanoru... nimalihakaru ila, nto kinroromela wira Muluku onookikhaliherya olakiherya oratteenexa wa nyuwo. Kileveleliwe, ko—kookhalana Mutthak'aka w'ohiy'ula; khino kinoalaleyale ethu emosaru voosiisu va mu—vamutekoni. Numala kinoorowa.

<sup>162</sup> Vano, ela vekeekhai ti yoorika. Munnona? Vano, muhaana oweha saana. Vano muupuwele, hiyo ninnaamini ni ninniixuttiha ekerej'ela, kahi khula etthu enrwa n'ukhuwela, othene onlavula ilavulelo, othene onvahana ntata ni mulaleyi, orina Ekumi Ehinimala. Masi ninnaamini wira nyuwo mwakhalana Ekumi Ehinimala, vakhala wira Muluku ohoovahani Ekumi Ehinimala, munikhalana voohimala. Munnona? Okhala wira nwehe. Vaahikhale siiso, Yesu mwixuttihi oowootha. Mwa Yohani Oowaarya 5:24, Ywo oohimya, "Ole oniiwa Masu Aka ni onimwaamini Ole okirumme ookhalana Ekumi Ehinimala, ni khanrowa olamuliwa, masi oovira mookhwaani khuphwanya Ekumi." Vano, nvaanyihane ni Yoowo. "Othene ale Atithi akivahaly'aya... Khaavo onwerya orwa wa Miyo vahikhanle wira Atithi anoomuruuha. (Miyo kinihimya Soolempwa.) Othene ole onrwa... Khaavo onwerya orwa wa Miyo vahikhanle wira Atithi Aka anoomuruuha toko. Ni othene ale Atithi Aka akivahaly'aya animoorwa wa Miyo. (Munnona?) Ni othene ale anrwa wa Miyo, Kinimwaavaha Ekumi Ehinimala (Yohani Oowaarya 6), ni kinoomuhihimuxa mahiku ookiserya." Awo ti moolumo Awe.

<sup>163</sup> Vano nkawehani. Katthuna otthikela mw'aEfeso kapiitulu 1, Paulo alaleyaka... Vano, aKorinto, khula mmosa aanikhalana elavulelo ni nsipo. Mwaweha vale ikereja sikina khasaarina mulatt'uwo. Owo khonahimyeke etthu mwaha wa yeeyo. Owo ootoko ohimya sa ilavulelo nipuro pi nipuro mukereja wa aEfeso, ekereja y'aRooma? Nnari! Awo yaahikhalana ilavulelo n'itthu sothene siiso ntoko aKorinto yiiraaya, masi awo yaakhalanne



oratteene. aKorinto khayaawerya okhaliha oratteene. Munnona? Masi Paulo aahirowa khukhaliha ekereja oratteene.

Vano, owo...Miyo kinnaamini, ntoko Oral Roberts sinihimy'awe, "Muluku ti Muluku ooreera murima." Nyuwo khamunaamini yeeyo?

<sup>164</sup> Nto nyuwo munimwiira, "Ahe, anghi aPentekosite n'ilavulelo nto, Munna Branham?" Miyo kinoona wira awo ahaakhela Eroho Yowarya. Vekeekhai ahaakhela. Vaareera, mwaha wa xeeni? Nkawehani. Munnaamini wira Owo Muluku ooreera murima? Tome aahihimya em meta, "Moosuwela, Pwiya..."

Othene aya akina yaahiwaamini. Khwira, "Oh, hiyo noosuwela wira Awo t'ekeekhai!"

"Oh," Tome khwira, "nnari, nnari, miyo nkinaamini. Enamuna emosa paahi kinrowaaka waamini, kihaana okhalana eyooniheryo. Kihaana ohela ikatha saka mpararini mwAya ni mmakhwattani mwAya mwathoroliwaaya."

Owo Muluku ooreera murima. Owo khwira, "Murwe, Tome. Ela va."

"Oh," Tome khwira, "vano kinnaamini."

<sup>165</sup> Owo khwira, "Ayo, Tome, vamanly'anyu okoona, n'ukikwannya, n'uhela ntata Naka...matat'anyu mpararini mwAka, munnaamini. Masi aatepa otthuvuliwa ale ahinatoko woona masi anaamini." Owo Muluku ooreera murima. Owo onnoovahani yoothuna ya murim'anyu, vekeekhai. Nrowe paahi nimwaamini Yoowo. Nlo ni—nlo ni—nlo nikuma n'okhwa wa Satana. Okathi mutthu onimukux'awe Muluku mwa Masu Awe, munna, eyo enoomwiiva Satana khula okathi. Iwo t'umana wootepaxa Satana okhanly'awe ophwanyaka, okathi mutthu onimukux'awe Muluku mwa Masu Awe. Ayo, mulopwana. Ntoko sihimaly'aka, "Mutthu khankhala mukumi paahi (Yesu, ohiy'uwo), masi ni Masu othene ankhuma..."

<sup>166</sup> Vano, nwehe ela. Vano kinrowa opacerya eversiikulu yoopacerya:

*Tivo-nto, nihiye miixuttiho soopacerya sa mwaha wa Kristu, nitthareke makhalelo ooreera voomalela;... (Vano, etthu yoopacerya kintthun'aka wira musuwele: Paulo onlavula n'ani va? aHeperi. Awo aniira, "aHeperi," ale aniixuttiha, Eliivuru y'aHeperi. Eyo ekeekhai? aYuta yaamukhoottale Yesu... Munniwerya—munniwerya ovara saana vano? Owo onlavula n'aYuta, owooniheryaka eruku ya ikano okhala ethooneryo ya Kristu. Itthu sothene sa khalayi ntoko ethooneryo ya naanaano. Vano nwehe.)*

*... nihiye miixuttiho soopacerya sa mwaha wa Kristu, nitthareke makhalelo ooreera voomalela;... .*

167 Vano, owo onlavula n'awo mwaha wa miixuttiho. Nrowe nilavule itthu sooreera voomalela. Vano, nyuwo munikhalihiwa ooloka mwa Muluku okathi muntthittiw'anyu ekanyeryo ni Eroho Yowarya *mpakha* nihiku no woopoliwa wanyu. "Ole oniyariwa a Muluku (Yohani Oopacerya) khoniira etampi; owo khokhanle wiiraka etampi, okhala wira Epyo ya Muluku enkhala mwa yoowo."

168 Mutthu osareiye Eroho Yowarya, kahi onuupuwela wira oosareya, masi ole oniyariwa ni Eroho ya Muluku khoniira etampi, okhala wira Epyo ya Muluku eri mwa yoowo, ni khokhanle wiiraka etampi. Munnona? Bibilia onnihimya yeeyo? Tivo eyo vo. Nyuwo mwa... Kahi ele muniir'anyu, ele, t'ile, kahi ele olumwenku oniwuupuwelel'ayani, t'ile Muluku oniwuupuwelel'aweni. Munnona, munnona? Khamukhanle... Vanweryaneya sayi miyo okhalana nrumelo na mukhulupale a mpooma, wira pooti weettiha kaakuvaka ikilomo miloko mithanu na mosa ni xexe khula ewoora mpooma, vano mupiliisa onakivara? Khonwerya. Kinwerya sayi wira etampi okhanlene mukuttho w'ephome voohiyererya ohoolo wa Muluku, vaavo Owto hata ohinikoon'awe miyo; ekhanle-ene evololiheryo va—va... ohoolo wa miyo ni Muluku, nikula na Ephome? Maana hiyo nihookhwa, nto ekumi ahu yoosukiwa mwa Kristu ni Muluku, nootthittiwa ni Eroho Yowarya. Vanweryaneya sayi nyuwo wira etthu yootakhala vamaithoni va Muluku? "Naairakaru etampi vootthuna wahu (aHeperi 10) nimanlene osuwela Ekeekhai, kuuvo-tho mukuttho wa itampi." Va ti yoohiweryaneya (munnona?) wira etampi vootthuna.

169 Vano, nrowe nikelele ohoolo nisomaka. Vaareera.

*...makhalelo ooreera voomalela; nihitthikelaka-tho mulipiheryo wa—wa orukunuxa murima ni miteko s'okhwa, ni... omwaamini Muluku,*

*Ni mwiixuttiho w'opatiiso, ...wiixatherya matata, ni sa ohihimuwa w'alipa-ookhwa, ni... olamuliwa ohinimala.*

*Nto siiso... hiyo nnimwiira, Muluku atthuna.*

(Vano va ti nipuro awo yaatthun'aya opacerya, okhuma eversiiikulu 4.) *Tthiri eyo khinweryaneya w'ale... yaatonko omwaleeliwa, yaalawinhe yoovaha ya wirimu, ni yiirale mpantte wa Eroho Yowarya,*

*Ni-tho yaalawinhe oreera wa masu a Muluku, ni overya wa olumwenku onrwa,*

*Awo yamora, waahokoloxerya—waahokoloxerya-tho orukunuxa murima; okhala wira wa awo animukhomela-tho Mwaana a Muluku, amuulihihaka muru ohoolo w'atthu.*

170 Vano, vano, eyo enkhala ntoko, mwa enamuna munsom'anyu vale, wira mutthu aamuwerya waakhela Eroho Yowarya, vano nto onatthikela ottuli khupweteya. Masi khinweryaneya owo wira. Munnona? Owo khonwerya wira. Owo apweteya vale, Kristu ohotha. Munnona? Khinweryaneya w'ale yaatonko omwaleeliwa. Vano, nwehe va. Owo onlavula n'ani? Owo onlavula n'aYuta ale a mmukaanoni. Owo khonahimyeke wira mutthu osareiyе Eroho Yowarya; owo iirale, "Vakhala wira owo oolawiha Masu a Muluku."

171 Vano, mukihye paahi kihеle mwa nlikanyiho, wira moone ni muhialelele vano. Vano, owo onaalepela iya aYuta. Amosamosa a awo t'alipa-oowaamini a mmukaanoni. Munnona? Owo iirale, "Vano, hiyo ninrowa ohiya miteko iya nilavule mwaha wa omalela." Khwira, "Vano, ninlavula mwaha w'opatiiso, n'uhihimuwa w'alipa-ookhwa, ni wiixaatherya matata, ni itthu sothene; masi nrowe nikelele ohoolo vano nilavule mwaha wa omalela. Vano, ninrowa olavula mwaha wa okathi munkel'anyu mwa Eroho Yowarya. Vano, munnikhalaka mmithukumanoni okathi munci-ene. . ."

172 Ni nyuwo munniwoonaka atthu awo. Awo anoorkhala vakhiviru; awo khankela nnakhala khankhuma. Awo ennaasivela Eroho Yowarya. Awo annoorwa khuthukumana. Ni khino Eroho Yowarya enniira etthu, atthu, awo anootupha ekhuwele, n'utupha osulu ni vathi mwaha wa yeeyo, masi khankhalakhala etthunaka waakhela Eyo. Nnari, nnari! Munnona? Vano awo animwiira, "Oh, ayo, ti yooreera. Oh, miyo nkinsuwela ya yeeyo vano." Munnona, munnona, munnona? Alipa-oowaamini a mmukaanoni. Vakhiviru paahi mpakha vakanly'aya olawihaka yeeyo, masi nnakhala vo khanaakhela Eyo. Munnona? Vano, anoorkhala vakhiviru siiso okathi munci-ene mpakha nuvira okathi vakhani anoorkhuma voomalela. Kinoowerya ohimya masina a anci-ene yaari mutapernakulu, yiirale etthu yeeyo. Arootthikela-tho omora, otthikela orukunuxa murima, khuuvo orukunuxa murima w'awo. Awo aariipihа murima Eroho Yowarya eyo khwaahiya. Awo ankhala vakhiviruxa mpakha. . .

173 Va, mwakhunla-ru ni miyo (khamurina okathi, koosuwela, vano) masi mwaamukhunla Otumererya kapiitulu 1 musome, munimoona etthu emosaru. Mulepaka vano, Otumererya kapiitulu 1. Vano, opacerya versiikulu 19 ni osoma mpakha 26. Otumererya. . . Munimoona. . . Vano nkawehani. Isarayeli othene. . . Etthu atthu awo yiiraly'aya, awo yaahirwa mpakha oKadexi-barne. Oh, kinnoona etthu! Etapernakulu ila, olumwenk'ula w'ePentekosite ori oKadexi-barne naanaano va. Eyo ekeekhai voolikana, Munna Neville. Hiyo nri oKadexi-barne, ekhukulu y'olamuliwa-wo ya olumwenku (yaari ekhukulu y'olamuliwa-wo).

174 Vano ahotteli yaahirowa. Yoxuwa khwira va, "Vano,

kihaaruma ahotteli,” wala Moise, kiireke, “Kihaaruma ahotteli, muloko nanli, mmosa a, mulopwana mmosa a khula nimosa wa mahimo anyu. Kihaaruma wira yahottele muttethe ni eniruuhele ehapari.” Eyo ekeekhaii?

Vano vahokolowans’aya, yaahikhala athanu n’axexe w’ale muloko n’aili yiirale, “Oh, owo muttethe wooreera, masi oh, ikharari, khaninwerya okuxa. Oh, wulu! Amori arisa weiwe, nto hiyo ninoooneya ntoko anasope w’awo. Awo atthu a ikhotto. Ixiri saya ti suulupale. Oh, khereere. . . vano, kaamwamputi nikhwiye-ene wEjitu ohikhanle nyuwo oniruuha nno.”

<sup>175</sup> Masi, Kalebi mwaamukhaani ni Yoxuwa yaaheemelasa vale khwaamaaliha; khwira, “Hiyo ninniweryaxa okuxa.” Ayo, mulopwana! Ti yeeyo. Vano nkawehani. Exeeni yiiraneiyee? Kalebi ni Yoxuwa yaanisuwelasa wira Muluku aahinvaha natiri wa yoowo: “Nkincala moota ory’aya muulupale, moota ikhottiheryo siry’aya, orakama xeeni siry’aya, wunnuwa xeeni siry’aya, Eyo khena naata n’iyo. Muluku ohimnye siiso, nto hiyo ninooowerya okuxa.” Nto nyuwo moosuwela wira awo yaari aatthu anli paahi, ota w’ale imilyawu piili ni nuusu, yaavolonwe mmuttettheni? Okhala wira awo yaahilipiherya waamini waya ele Muluku aahimaly’awe okhala Ekeekhai. Amen!

<sup>176</sup> Etapernakulu, naanaano va, emphwanyaneyaya oKadexi-barne. Nkawehani, atthu ale yaari vakhiviruxa mpakha yaalawinh’aya iwuuva sa mmuttettheni. Awo yaahilya iwuuva. Okathi Kalebi n’akina yaarowaly’aya khuruuha iwuuva, awo yaahirukula kamosa-kamosa khulyaaka. “Oh, ti soosiva, masi khaninwerya oxintta.” “Ale yaalawinhe muteko wooreera wa Muluku, yaalawinhe Eroho Yowarya, yoonale ereerelo Aya, khulawiha ya Yeeyo, yaalawinhe Masu a Muluku. . .” Munnoona yeeyo? Khuuvo hata mmosa w’atthu ale, hata mmosa w’ale yaatthuniheriwe olapuwa. Awo yaahipweteya mmuttettheni mwaya, wenno nno mothakoni. Awo khalalupuweke, masi yaari vakhiviru voophiyerya olawiha, masi wo ohikhalana mahala oophiyerya ni waamini wira ekuxe Yeeyo. Ti yeeyo ekhanle.

<sup>177</sup> Vano. Vano munwiriyanee mutth’uwo ootthuneya olempe ewarakh’ela. Nrowe paahi nisome eversiikulu enttharelana. Nwehe paahi okathi vakhani. Munwehe Paulo. Vano nrowe nisome 7:

*Tthiri etthaya. . . enrupeliwa epula imaara sinci-ene, ennaavaha mihokorokho sooreera ale alimme, ennaakhela mireeriho sa Muluku:*

*Masi ele eniima miiwa ni malaxi oonanara, khirina muteko, nto otakhaliwa waya ori vakhiviru; emalelo aya opahiwa.*

<sup>178</sup> Vano, munnoona enihimy’awe? Vano nwehe. Yaahikhala yookoha ela va; vano, nto numala ninoomaliha. . . Etthu ila yaanikitikiniha mwa iyaakha sinci-ene.

179 Kaahirowa muthukumano mmosa emaara emosa weiwo atthu yaalavul'aya ilavulelo oMishawaka, Indiana. Vano, kiri ohoolo w'atthu aka. Nyuwo munniwiiwaka atthu awo... mookiiwa omuhimya wahala a makhalelo aka, ni mwaha wa mulopwana mmosa ooripa iirale, "Ola ori va. Ola ori va." Vano, miyo koothariha eyo.

180 Masi ekina aya: miyo kaahikumana n'alopwana anli. Awo yaari... Mmosa aamuhimya mutthaka, ole mukina n'utaphulela. Mmosa aamuhimya mutthaka, nto mukina n'utaphulela. Nto munna, awo yaarisa oratteene. Sa paahi... Miyo khuupuwela, "Muluku aka! Nkinatoko woona etthu ntoko ele." Miyo khwira, "Kiri eriyari ya malaikha." Miyo khuupuwela, nkinatoko woona etthu... Mmosa aamulavula, nto mukina aya... .

181 Vano miyo kaakilanthe vale, ntoko mulaleyi mmosa mmiravo, nyuwo... [Nipuro vahiiitthu mufiitani—Mol.]... axilopwana oowanli emaara ekina kaahivahana ntata n'awo. Kiira kihinatoko owoona atthu ntoko ale kookhalaru. Awo yaamuhimya mutthaka, nto mukina aya aanitaphulela. Nto wulu, wulu! Yaari yooreerexa! Mmosa, aamulavula ni mukina aanitaphulela. Oowanli... Awo yaanikhalasa ootteela wiitho okathi yaavenyihasa'aya matat'aya. Miyo khuupuwela, "Oh wulu, wulu, kiri yayi kookhalaru. Ela t'itthu ene!" Miyo khwira, "Wulu, aPentekosite aakhalanasa exariya." Eyo ekeekhai voolikana.

182 Kiira kihinatoko woona vanci-ene woohikhala paahi ele vakhiviru nno, weiwo e... Khino athiyana anli ary'ene mmutekoni nipuro nlo. Nto awo yaaninyakulihana; nto mmosa aanimwiihana mukina, "erintta ya nrepo," ni, moosuwela, siiso paahi, anyakulihana mmosa ni mukhw'awe. Kahi ohaattitimiha axithiyana vano wala etthu, masi paahi... Eyo—eyo yaari yoonyohowa. Aakhanleene a nyuwo... Munnuupuwela, Munna Graham. Nyuwo mwaari mmiravo mwaamukhaani okathi uwo. Nto siiso, eyo t'inamuna yaary'aya.

Nto miyo kaahiwiriyana eyo, nto khuupuwela, "Oh, wulu, kookumana ni malaikha."

183 Nihiku nimosa kirukunuwelaka oloomoni w'empa, ntoko nihiku na nenli, kaahikumana ni mmosa w'axilopwana. Miyo khwira, "Ehaali anyu, Mulopwana?"

Owo khwira, "Ehaali anyu?" Owo khwira, "Mwa... Nsina nanyu ti pani?"

Nto miyo khwira, "Branham."

Owo khwira, "Nyuwo mwa a yayi? Nno?"

Nto miyo khwira, "Nnari, miyo k'a oJeffersonville."

Owo khwira, "Ahe, ti yooreera. Mwa muPentekosite?"

Miyo khwira, "Nnari, mulopwana, nkihiyo." Miyo khwira, "Miyo nkinikupali enamuna y'ePentekosite yo waakhela Eroho

Yowarya,” miyo khwira, “nnya,” miyo khwira, “Kiri va wira kaakhele.”

<sup>184</sup> Owo khwira, “Ahe, eyo ti yooreera saana.” Nto kilavulakano, kivaraka erooho awe (ntoko muthiyana v’ehimeni), owo aari muKristu eekeekhai. Munna, kinihimya wira aari oratteene. Owo aari oophwanela. Vano, nyuwo othene. . . Akavi anikhalaka mmithukumanoni mwaka ni woona ithu iyo okhumelela? Munnona? Nto mulopwan’owo aari oratteene. Vano nto, miyo—miyo khuupuwela, “Vale! Wulu, vooreerexa!”

<sup>185</sup> Makaaripi ene yaale, oxekuwa okathi uwo, kaahikumana ni mukina. Miyo khwira, “Ehaali anyu, Mulopwana?”

Owo khwira, “Ehaali anyu? Nsina nanyu ti pani?” Miyo khimuhimeerya. Nto owo khwira, “Moo. . . Mwa—mwa muPentekosite?”

Miyo khwira, “Nnari, mulopwana, kahi muPentekosite saana, nkinikupali.” Miyo khwira, “Miyo kiri va paahi wira kiixutte.”

Owo khwira, miyo khwira, owo khwira, “Muhaakhela Eroho Yowarya?”

Miyo khwira, “Miyo—miyo nksuwenle.” Miyo khwira, “Vootthariha ele nyuwo othene murinas’anyu, kinoona wira nkirina.”

Nto owo khwira, “Mootoko olavula ilavulelo?”

Miyo khwira, “Nnari, mulopwana!”

Owo khwira, “Weso nlelo khamurina.”

<sup>186</sup> Nto miyo khwira, “Ahe, miyo—miyo kinoona wira eyo eekeekhai.” Miyo khwira, “Nksuwenle. Miyo kinnilaleya iyaakha soophiyaka piili, ntoko siiso,” nto miyo khwira, “Nkinsuwela vanci-ene ya Yeeyo.” Miyo khwira, “Khino nkinsuwela.” Miyo khwira, “Nkinwerya osuwela saana. . .” Okhala wira, kaaphavela omukhaliha vaavale (munnona?), wira kivare. Nto vairaly’aka siiso, vakhala wira kaahinto okumana ni namirima miili, owo aari mmosa a yaawo. Amwaar’awe yaari ooriipa maihi; vano owo aakhala ni muthiyana mmosa ootteela maihi, aahikhalana aana aili ni yoowo; vano alavulaka ilavulelo, ataphulelaka oratteenexa saaweryaney’aya. Nto miyo khwira, “Vano, Pwiya, kiikelinhe vayi?” W’okhala mwa malaikha, nkaasuwela waarowaka okela. Miyo khwira, “Miyo—miyo—miyo ka ootthara yoophaveleya; ohaana okhala Bibilia. Ehaana okhala saana. Yookhala etthu ehilonke nipuro nlo, Pwiya. Vaaweryaney sayi ile okhala?”

<sup>187</sup> Miyo kaahirowa omuthukumanoni ohiy’ule, vano Eroho ele yaanikhuruwa; nto munna, vaaniweryaneyya woona okhala Yeeyo, wira Eyo yaari Eroho Yowarya. Ayo, mulopwana! Yahaakhanle, Eyo yaanikhalela onamoona n’irooho aka wira yaari Eroho Yowarya. Nto miyo kaari mulaleyi mmiravo

paahi, ni nkaasuwela vanci-enexa, sa olamula wa erooho. Masi kaakilanthe vaavale. Ni kinnimusuwela Muluku ene yoowo okooponle, waari moonelo mmosa yoowo. . .Koono wira ntoko kaarowa ophova nipatho, waari moonelo mmosa wooreerexa mpaani mme. Nto miyo khuupuwela. . .

<sup>188</sup> Yaahikhala vale oophiyaka ekonto emosa ni imiya thanu. Nto miyo khuupuwela, “Wulu, oh wulu!” Makhuru manli wala mararu a yaawo yaahithukumana. Nto miyo khuupuwela, “Khwira, wulu! Enweryaneya sayi okhala? Vano, Eroho ele yuulupale mpaani mu ekhuruwaka siisaale; nto va, nkawehani ila eniraneya vasulu vale, athu ale elavulaka ilavulelo, etaphulelaka, evahaka mutthaka voolikana-ene— nto mmosa aya namirima miili vano mukina mutthu eekeekhai a Muluku.” Nto miyo khuupuwela, “Vano, kiri othene ootikinihiwa. Nkinsuwela yo wira.”

<sup>189</sup> Ahe, naanaanoru nuvira yeeyo, mpatthani aka ooreera murima, Munna Davis (moosuwela), khupacerya wira kaari mwaatteepa. Eyo etthu y’othweelana mwanamwane muthiyana, moosuwela. Nto siiso, miyo nkaathenle, nto vano miyo. . .Owo khupacerya okilavulela voohiloka, vano nto akelelaka ohoolo, okiirela iperwa.

<sup>190</sup> Vano hiyo naarina ekhaani. . . Vano ame anyu ni hiyo othene naanikhalanaka mithukumano sikhaani mapuro oohiyana-hiyana. Itapernakulu khasaa—khasaakhanle okathi uwo, nto hiyo naakhalanaka mithukumano sikhaani mapuro oohiyana-hiyana. Nto vookiserya nihiku nimoso, vamanly’aya otekiwa etapernakulu, iyaakha sinci-ene ohoolo waya, kaahirowa Onxiloni Green mmuttuphani mwaka ovekela, okhala wira Munna Davis aaroothimya itthu soonanaraxa mwaha wa miyo mu—mu—mpaphloni mwawe. Miyo kaanimphenta. Nkaatthuna wira ekhumelele etthu, nto miyo—miyo kaaronwe iwe onvekelela. Vano kaahirowa iwe, khukela mmuttuphani. Ni kaahikhala memmo mahiku oophiyaka maili. Nto miyo khwira, “Pwiya, mmulevelele. Ole—ole khonlakela—khonlakela eyo.” Nto miyo khuupuwela, “Moosuwela. . .” Kaammalaru wuupuwela Yoolempwa emosa.

<sup>191</sup> Vano miyo khukhumela ota. Ni naahikhala nttoro (nttoro nlo nlelo nimphwanyaneya vaavale, kaari vaavo voohikhala khalayi) vathi va mwaako ni onkhala ephiro yaamukhaani enkhumu muratthi mukhaani. Nto miyo khukilaathi vanttoroni, kiwehawahaka miyaako ottuli—ottuli iwe, nto khumpweha Bibilia aka siisaale. Miyo khuupuwela, “Moosuwela. . .” Kuupuwela Yoolempwa emosa: “Latowero, khoreere okiirela yootakhala, ni oohimya itthu.” Moosuwela. . . Miyo khuupuwela, “Kookupali wira kinoosoma yeeyo.” Miyo khimukhunla Bibilia, nto khwira, “Ahe, . . .” Khuukuttha wiitho waka, vano ettheke khuruma, vano eyo khukhunla v’aHeperi 6. “Ahe,” miyo khwira, “va kuhiyo vathu vaary’aya.” Vano miyo khumpweha ottuli sa.

Vano etheku khuruma-tho khikhunla-tho Yeeyo. Nto miyo khwira, “Vano, ti yootikiniha, etheku erumaka ettikiheryaka vaavo siiso.” Tivo miyo khuupuwela, “Ahe, kookupali wira kinoosoma.” Nto yaahimya wira:

*Tthiri eyo khinweryaneya w'ale yaatonko omwaleeliwa, . . . yira mpantte wa Eroho Yowarya, yaalawinhe e . . . Masu a Muluku, ni etthu ya olumwenku onrwa.*

Miyo khuupuwela, “Ahe, nkinoona etthu ni yeeyo.” Kitthikela kisomaka, ekapiitulu yothene. Hat'etthu mmo. Miyo khwira, “Ahe, eyo—eyo enniphiyerya.” Nto miyo—miyo kaahona sa, vano khutthikela-tho. Vano miyo khimukuxa Owo, nto khuupuwela, “Ahe, exeeni iyo?” Miyo khutthikela kisomaka, kisomaka, kisomaka, miyo khwira, “Ahe, nkinwerya osuwela saana.” Vano kitthikela . . . Nto kitthikela kisomaka:

*. . . khinweryaneya w'ale yaatonko omwaleeliwa, . . .*

Khuphiya nipuro nimoso va vaavo ehimmy'aya wira:

*Etthaya . . . enrupeliwa epula imaara sinci-ene, ennaavaha mihokorokho sooreera ale alimme, ennaakhela mireeriho sa Muluku:*

*Masi ele eniima miiwa ni malaxi oonanara, khirina muteko, nto . . . otakhaliwa waya ori vakhiviru; olamuliwa waya opahiwa.*

<sup>192</sup> Miyo khwira, “Kiireke enihimya exeeni?” Miyo paahi . . . Vano, nkuupuwela hat'etthu nipuro nle. Kuupuwelaka yeeyo paahi. Nto vaavale kikilante-ene vale, koona wira Apwiya yaamukivaha yoowoona mwaha wa Munna Davis n'akina vale. Nto miyo kaakilante vale; miyo khuweha, vano kaahona etthu evilikeyaka v'ephekani ohoolo waka. Nto waari olumwenku vaavilikeya. Nto kaahona wira waari woopwexakaseya, wooneya ntoko wira wothene waaroolimmwa. Nto Mulopwana mmosa khukhumela ni e—e—etthu emosa yuulupale ohoolo Wawe yoosareya epyo, nto Owo aanimisa epyo elapo yothene Owo aavir'awe. Nto Owo aahirowa mpakha vakompa v'elapo, vano aahilakaseya wiitho waka. Nto amalakaruru olakaseya wiitho waka, va aahirwa mutthu mmosa ooneya otakhala, aawanre ikuwo sooriipa, arowaka siisa, arowaka, wiu, wiu, amwaryaka ipyo sootakhala, wiu, wiu. Nto miyo kaamuweha, elapo ethhikelaka ovilikeya . . .

<sup>193</sup> Nuvira okathi vakhani yaahikhumela etriku. Vano vakhumenly'aya etriku, yaahikhumela malaxi oonanara, ikhuuwa, ni miiwa, ni malaxi oowunkha, ni sothene saahinnuwa vale, malaxi a ephwamwaasi, ni itthu sothene saannuwa eriyari y'etriku. Nto sothene iyo saannuwa vamosa. Nto yaahirwa eyuumu, y'ekeekhai yootakhala, vano etriku yaamukhaani yaahuuramiha muru so, ni malaxi oonanara, ni ekhuuwa, ni miiwa, sothene saahuuramiha muru. Khula



nlaxi [Munna Branham onrumiha nsu n'ottiya iphumu—Mol.] simumulaka siiso. Vaaniweryaneya wiiwa tu. N'iyoye saanlela epula, epula.

<sup>194</sup> Nto nuvira okathi vakhani, naahirwa neeku nuulupale, vano maasi yaahikhwalala vowaatta. Nto vamorenly'aya vale, etriku ile yaahitupha khupacerya okhuwela, "Ovuwa, Aleluya, Attotopeliwe Apwiya!" Malaxi oowunkha yaahitupha khukhuwela, "Ovuwa, Attotopeliwe Apwiya, Aleluya!" Miiwa ni sothene saya, saamwiina mmatta mothene sikhuwelaka, "Ovuwa, Aleluya, Attotopeliwe Apwiya!"

Ahe, miyo khwira, "Nkinwerya osuwela saana yeele."

<sup>195</sup> Yoowoona khukihya; vano miyo khutthikela-tho wupuwela yeele: "Malaxi oonanara ahalenle okhoottiwa." Vano kaahisuwela saana. Yesu oohimya, "Epula ennimurupela naxariya n'ule ootakhala." Mutthu onoowerya okilaathi vamuthukumanoni, onoowerya olavula ilavulelo, onoowerya okhuwela ni wira siiso ntoko akina ni Eroho Yowarya yooloka nave nlelo khuhikhala Momweneni wa Muluku. Eyo ekeekhai voolikana. Yesu khohimye wira, "Anci-ene anoovenya nihiku nlo ni wira, 'Pwiya, nkiwoomonle axetwani ni Nsina n'Anyu; miyo nkihimye s'opofeta (nkilaleenrye) mwa Nsina n'Anyu; nkivanre miteko soowaatta s'owerya mwa Nsina n'Anyu?'" Yesu khwira, "Mukhume wa Miyo, nyuwo muniira sootakhala, nkinatoko woosuwelani." Ankhi yeeyo?

<sup>196</sup> Ela vekeekhai t'itthu enihimya'aya va. Munnona? Awo yaahilawiha epula yooreera enikhuma Wirimu. Masi opacerya wene, awo yaahivonya. Opacerya wene soophavela saya khasaari sooloka; mawoko aya khayaari ooloka. Eyo, khamukhanle ohimya. E... Moosuwela, wohephani owo irale, "Munthuna wira kirowe kaphelakase sothene?"

<sup>197</sup> Owo khwira, "Muhiye sinnuweke vamosa, nto nihiku nlo miiwa iya ni ikhuuwa sinoopahiwa vamosa, vano etriku enoorowa mmuruttuni." Vano, munrowa osuwela sayi t'uvi okhanle mwiiwa, wala t'uvi okhanle ekhuuwa, wala t'uvi okhanle etriku? "Ni mihokorokho saya munimwaasuwela." Moore, munna mulopwana, muthiyana, mwiri wooreera khokhanle wiima muhokorokho woonanara. Hata wira, nipuro nlo mphironi, enimoophwanyani. Tivo, nyuwo mumphavela opatiiso wa Eroho Yowarya... Kootteeliwa murima onakhaleru pani olempe eyo. Munnona?

<sup>198</sup> Vano, alipa-oowaamini awo a mmukaanoni wu, awo yaari saana n'awo. Awo yaahilyihiwa masoma ni olyihiwa waya masoma. Awo yaahirowa muttethe Muluku aalaihenny'awe, mpakha muxerexere mwaya. Athu anci-ene anniphiya muxerexere mmo. Mutthu onoophiya mpakha opatiiso wa Eroho Yowarya vano khukhootta. Owo khonthuna wiiwaha. Owo onimweetta mpakha va opatiiso wa Yoolempwa ni Nsina na Yesu

Kristu, vano khunarukunuwela ettuli, n'ukhootta n'uhitthuna woona.

<sup>199</sup> Khiivo hata Yoolempwa emosa mBibiliani mothene vaavo mutthu otonko awe opatisiwa ni nsina n'Atithi, Mwaana, Eroho Yowarya, nnakhala Yoolempwa emosa. Ekereja Katolika t'epacenrye, khukhuma ni Lutero, khurwa mwa Wesley, vano ehoorwa yeettaka mpakha va. Eyo ekeekhahi voolikana. Masi yooruma ya Yoolempwa ti Nsina na Pwiya Yesu Kristu. Owo opatiiso w'arummwa. Khamukhanle wira yeeyo vano khukhala mmuromoleloni. Ti yeeyo.

<sup>200</sup> Vano, munnoona itthu iyo? Opatiiiso wa Eroho Yowarya, soovaha sa Eroho, itthu Muluku oniruuhaawe. . . Muhokorokho wa Eroho ti ophenta, ohakalala, ovilela (oh, muniira, "Masi Munna Branham, avuwihawe Muluku, miyo kinnivilela." Enikhala ntoko yeeyo. Miyo kaahirowa Ohio nno woohikhala khalayi, nto mutthu mmosa khukikoha, aalempe ewarakha nno khukikoha sinto kaanaapatisa atthu ni Nsina na Yesu Kristu. Miyo nkinahimeye etthu. Awo khuphiyererya osuwela khula enamuna, vano arumeyi muloko n'athanu na mosa yaakhaliherya khukhuma. Iwo ovilelaa kuhiyo!)—ovilela, oreera murima, wiisumaaliha, ereerelo murima, ovilela, ni Eroho Yowarya. Munnona?

<sup>201</sup> Oh, munna mulopwana, muthiyana, hiyo nri—hiyo nri oKadexi-barne. Munoolawiha vano. Nsana ohiyu Eroho Yowarya yaahinikhuruwela, yaahirwa mwa hiyo, ntoko epheyo ya ikuru. Eyo yaahikhala vasulu v'anci-ene a nyuwo. Olelo arumeyi annithotola itthoko nno n'iwe, yiixaatheryaka matata ni yaavekelelaka ale amphavela Eroho Yowarya. Muhikuxeke erantteliho. Muhikuxeke enamuna emosa y'enyakulelo. Muhikuxeke enamuna emosa ya moonelo. Mulipelele vaavo mpakha Muluku owuupani ni wookhalihani yoopattuxiwa esya, wookhalihani mutthu musya. Nyuwo munlawiha Yeeyo vano, olawiha paahi, masi muhiye Epompa yoochooleleni mpakha vameesa, nto—nto Mwaapwittipwitthi n'Epompa sikilaathi vamosa, silyeeke voohimala Masu a Muluku. Maana Awo anookhala okathi ohinrowaaya okhala erimu n'ilapo ya vathi; Masu a Muluku anookhala. Eyo ekeekhahi.

<sup>202</sup> Xontte muhuupuwele wira k'olipa-murima. Kaakhanle-ene, nkilakenle okhala. Vakhala wira. . . Kinroromela wira kihaakhula sookoha iya; kihaakhula, voosuwela waka saana.

<sup>203</sup> Nto tivo, mwa aHeperi 6, moonna vale, Paulo onlavula n'aHeperi yiirale, "Ahe, ninoorowa ni nyuwo mpakha va." Awo yaamurowa ophiya. Munnona? Khwira, "Vano, nyuwo. . ." Ale yaaphiyale khulawiha.

<sup>204</sup> Kinoomalaru oweha mpaani. Wira kiwooniheni eyooniheryo ya Muluku Mukumi. Kinroromela wira nkinimukhaliha mutth'ula oosuwanyeya. Kaahirwa va woohikhala khalayi

kikhumaka muthukumano mmosa, khooleelani wira mpatthani mmosa ooreera murima, mpatthani aka oomeekha, muxirikha a wooyayani, mulopwana mmosa onkhalaka ookireerela murima, mulopwana mmosa otonko okhala okereja waka, ni aakhalaka munn'aka; miyo kaamwiihana Busty. Nsina nawe ti Everett Rodgers; aakhala oMilltown. Akavi anuupuwela okathi waarwi'y'aka va khuhimya? Owo aari nno oxipiritali; mameetiku yaaroomooperari, khimuhula, ni khaareerane kankuru awo khimuttottha paahi. Khwira, "Owo onoomalamala naanaanoru; isumana vakhani onimookhwa; ti yeeyo tu enrowa okhala. Owo onoomalamala, ti yeeyo tu."

<sup>205</sup> Munnuupuwela moota weemenly'aka va vaplataforma, khunvekelela? Khurowa iwe khuvolowa musaala, ethhu emosa ekivihaka mmurimani mwaka. Miyo khuvolowa musaala, nto vamanly'aka waakumiha athhu othene wira kiwerye. . . Munna Everet aaphwanyaneya vale. Nyuwo othene munnuupuwela ela. Miyo khuvolowa; miyo khwira, "Munna—Munna Busty." (Kaamwiihanne Busty.)

<sup>206</sup> Khalayi okathi waarin'ahu mithukumano sa mutakhwani iwe, aMetotista othene omwaakoni iwe (Gertie, mmosa aya), khurwa vasiiri, yaamuthurumela muviteerani wira yoone ethhu yaarow'aka ohimya, ni siiso, yoovaka ekereja Metotista owoomola. Vano nto, miyo khurowa khukhalana yoowoona vale, nto kaahoona enama yaakhitteliwe mulaathani. Miyo kaahivara ihopa sinci-ene khukweettya, khu—khuhela vekwaattyoni, vano khutthukha ikwaattyo sene. Nto okathi owehaly'aka. . . Nto sothene saari mwa yoowoona; kaarohiya—kaarohiya nikhuru n'athu neemenle-ene vathi va mwiri ohiy'ule khuwela vasulu va mwaako owannyawe Munna Wright. Nto awo khiyaawerya hata okiphwanya voosiisu aya. Miyo khwira, "Hata mmosa a nyuwo. . ."

<sup>207</sup> Keemenle-ene vaavale kilaleyaka, va khurwa Waarya weiwe; Nlumi nenle na Mooro khwiithomeya va ohoolo waka khwira, "Mukhume va murowe mutakhwani; Miyo kinoolavula ni nyuwo." Naari nihiku nenle, mmeeloni mwaya okathi ophwaanyiwaaka vamwaako. Miyo kaari vasulu vale; kaahivitha ekaaro aka mmalaxini, nto kaari vamwaako kivekelaka ohiyu wothene ni mmeeloni mwaya. Akina aya khurwa vale, khuphwanya ekaaro khuwela osulu iwe. . . Nlo naari nihiku Munna Graham Snelling, va, aakhenly'awe Eroho Yowarya ni wiihaneliwa muteko w'orumeyi.

<sup>208</sup> Osulu iwe vamwaako nipuro kaary'aka-wo, nto Owo—Owo khukileela ithhu soohiyana-hiyana wira kiire ni ithu saalavunly'ahu. Owo khukivaha yoowoona yo woona ihopa iya sookweettyiwa, khwira, "Ela ekerej'anyu y'oMilltown."

Nto xexe wala thanu sa seiyo khuvuluwa; nto miyo khwira, "T'ani uwo?"

Khwira, “Mmosa aya ti Guy Spencer ni mwaar’awe. Mukina aya ti Spencer mukina iwe, ni awaya.” Ni Owo aahikileela oohiyana-hiyana, yaarowa ovuluwa.

<sup>209</sup> Miyo khwaaleela; miyo khwira, “Ohikhale a nyuwo onlya.” Amwaar’aka ni miyo khanaari... Waari nihinatthi othelana; vano awo khurowa owaani okhala ohiyu wothene ni Munna Spencer muthiyana, muthiyana mmosa ooreera murima. Muthiyana mmosa ooreera murima, Guy Spencer mulopwana mmosa ooreera murima otonko onyakela elapo. Nto owo—nto owo khurowa iwe, ni Opal khwira, “Vano, nkawehani...” Khumwiirela Meda, owo khwira, “Vano, Meda, miyo kinnimwaamini Munna Bill.” Owo khwira, “Masi Opal avoliwa etala, owo ohaana okhuura enama ni mooce.” Nto owo aahirowa vale, ni waarika enam’awe ni mooce, khukilaathi wira akhuure, vano khupacerya ovekela, khuphiteerya meesa, anlaka, khaawerya okwannya. Vano awo khurwa ekaavyaka.

<sup>210</sup> Nto vamwaako vaavale nihiku nenlo, Owo aahikileela oratteene etthu yaarowa okhumelela. Owo khwira, “Ala anoorowa okhuma, ni ala akina anoorowa okhuma.” Masi Owo aahikhalana nikuttha nuulupale n’enama y’oheliwa mulaathani. Owo khwira, “Musuke ela wira oholo mwaarumeele athu a oMilltown.” Nto ohiyu mukina vamwiiwaly’aka Munna Creech... Owo aari vaava nsana ohiyu. Miyo nki... Munna Creech, muri muumu ohiy’ula? Okathi Munna Creech oruuly’awe wa miyo, khukiihana, nto Munna Creech muthiyana, anlaka; atith’awe yaaphwanyaneya vale. Khwira, “Munna Bill, muhaaleele. Vakhala wira animookhwa.” Khwira, “Kankuru onimwaakhuura; mameetiku ahaahula, nto t’osareya kankuru sinweryaney’aya.” Nto Will Hall (ni othene nyuwo munnimuupuwela), okathi meetiku ene aahunly’aya awo yaari oosareya kankuru... Miyo kaamwiitthokiha wira kirowe kaxaye ikhopa voosiis’ule, vano kaahoon mas’ale athomeiwe-ene okatthi. (Munnuupuwela ehantisi ene?) Nto mulopwana ene yoowo mukumii olelo. Soovira iyaakha sinci-ene khalayi. Owo ni Munna Busty yaari apatthani.

<sup>211</sup> Vano miyo kaahirowa oxipiritali, exipiritali esya (kinooliyala siniihaniwaaya, eri iwe oNew Albany) exipiritali esya. Vano miyo kaahirowa weiwo omoona Busty; nto okathi ovolonw’aka musaala, miyo khwira, “Munna Busty.”

Owo khwira, “Munna Bill.” Khuvara ntata naka ni okhomasana iwe wuulupale; mutokweene a Ekhotto Yoopacerya ya Molumwenkuni, nkinihimya ela okhala wira owo ori vaava, masi vekeekhai mutthu a murima wooreera ntoko ole ori mukamisetini yoopipila. Owo khuvara ntata naka. Miyo kinnikhalaka owannyawe; olya owannyawe; orupa owannyawe, ntoko wira kaari munn’awe. An’awe ni sothene, hiyo paahi—ntoko wira n’axinna a ephome emosa. Mulopwana mmosa ooreera murima.

<sup>212</sup> Nto owo... Masi owo khonaasuweleke oratteene Apwiya. Owo... Koompatisa ni Nsina na Yesu Kristu. Masi nihiku nle okathi mulaleyi Mmetotista iiraly'awe, "Khula mutthu opatisiwe ni Nsina na Yesu Kristu, akhume muheemani mwaka." Eyo yaari saana. George Wright n'akina khukhumasa. Oxekuw'ole miyo kaahirowa opatisa ni Nsina na Yesu Kristu oTotten Ford. Muthukumano awe wothene waahikela mmaasini khupatisiwa ni Nsina na Yesu Kristu. Tivo miyo khukelela ohoolo. Eyo yaari saana. Vakhala wira Muluku ori ni nyuwo, ti pani onthhuna woovirikanyani? Miyo nkisuwenle hata nipuro mulopwan'owo oronwaawe, etthu emukhumelenle.

<sup>213</sup> Nnakhala vo, kaahirowa oxipiritali. Vale aaphwanyaneya Busty ompaathale-ene oosareya kankuru, mameetiku hata, khayiirale etthu woohikhala omuttottha paahi. Busty khukiirela; owo khwira, "Munna Bill, ela ti ya niwoko. Khwiiraneya etthu."

Miyo khwira, "Ayo, Busty." Khupacerya woona Eroho ele ntoko epheyo ele ya ikuru kinihimyak'aka, moosuwela, ekelaka.

Owo khwira... Okathi ovolonwaaka mu, yaahikhala ekhweyi vanlothoni vale, yaari vanlothoni vale. Ekhweyi mwaataano; mwaataano wa Muluku. Muluku aahipaka mwaataano ni miyo vamwaako vale nihiku nle. Khumpweherya matat'aka Munna Busty khunvekelela.

Mameetiku yiirale, "Owo onoohileya. Owo onoomalamala tu. Khiivo etthu yo wira... Owo onimookhwa muhina mwa mahiku vakhani." Nto Busty Rodgers... Soovira isumana isumana sene, vano Busty Rodgers, okilante ottuli va mukereja ohiy'ula, mukumi ni a ikuru ntoko sihinatoko aka omoona kookhalaru. Nkavenyani, Munna Busty. Ole vale. Nrowe nimuttotlopele Muluku, atthu othene.

Yaathukumanne empa y'osulu,  
Evekelaka mwa Nsina Nawe.  
Yaahipatisiwa ni Eroho Yowarya,  
N'uwerya wa muteka waarwa.  
Vano, saawiireny'awe nihiku nle,  
Owo onoowiirelani.  
Kinnitthapa ohimyaka wira, "Ka mmosa a  
yaawo."

Ka mmosa a yaawo, mmosa a yaawo;  
Kinnitthapa ohimyaka wira, "Ka mmosa a  
yaawo." (Aleluya!)  
Mmosa a yaawo, ka mmosa a yaawo;  
Kinnitthapa ohimyaka wira, "Ka mmosa a  
yaawo."

Hata atthu ala ehihimyaka okhala,  
Wala wiihimya osuweliwa mulaponi  
Othene yaahimwaakhela Pentekosite aya,

Yaahipatisiwa ni Nsina na Yesu.  
 Nto annihimyasa vano khula nipuro,  
 Owerya Wawe nlelo omusaru.  
 Kinnitthapa ohimyaka wira, “Ka mmosa a  
 yaawo.”

Ka mmosa a yaawo, ka mmosa a yaawo;  
 Kinnitthapa ohimyaka wira, “Ka mmosa  
 yaawo.” (Aleluya!)

Mmosa a yaawo, ka mmosa a yaawo;  
 Kinnitthapa ohimyaka wira, “Ka mmosa a  
 yaawo.”

Vano, rwaani munn’aka, mphwanye eparakha  
 yeela

Enrowa orapiha murim’anyu wa etampi,  
 Enrowa opacerya orumiha ittiwi  
 soohakalaliha,

Ni okhaliha munep’anyu ovihiwaka.

Oh, eyo enooviha vano mmurimani mwaka,

Oh, nivuwihawe Nsina Nawe.

Kinnitthapa ohimyaka wira, “Ka mmosa a  
 yaawo.” (Nrowe niipe!)

Oh, mmosa a yaawo, mmosa a yaawo;  
 Kinnitthapa ohimyaka wira, “Ka mmosa a  
 yaawo.” (Aleluya!)

Mmosa a yaawo, mmosa a yaawo;  
 Kinnitthapa ohimyaka wira, “Ka mmosa a  
 yaawo.” (Akavi akhanle mmosa a yaawo?  
 Nvenxe matata. Oh, wulu! Oh, moota  
 onthap’aka okhala mmosa a yaawo.)

Mmosa a yaawo, mmosa a yaawo;  
 Kinnitthapa ohimyaka wira, “Ka mmosa a  
 yaawo.” (Aleluya!)

Mmosa a yaawo, mmosa a yaawo;  
 Kinnitthapa ohimyaka wira, “Ka mmosa a  
 yaawo.”

Yaahitthukumana emp’ele y’osulu,

Evekelaka mwa Nsina Nawe.

Yaahipatisiwa ni Eroho Yowarya,

Vano n’uwerya wa muteko waarwa.

Vano, saawiireny’awe nihiku nle,

Owo onoowiirelani.

Kinnitthapa ohimyaka wira, “Ka mmosa a  
 yaawo.”

Oh, mmosa a yaawo, mmosa a yaawo;

Kinnitthapa ohimyaka wira, “Ka mmosa a  
 yaawo.” (Aleluya!)

Mmosa a yaawo, mmosa a yaawo;

Kinnitthapa ohimyaka wira. “Ka mmosa a yaawo.”

Vano, niipaka-tho ekooru iyo, kintthuna wira khula mmosa a nyuwo murukunuwe, nvahane matata ni mutthu vakhiviru ni nyuwo, mwiire, “Nyuwo mwa mmosa a yaawo?” Munnona? Vaareera.

Oh, mmosa a yaawo (Koosuwela wira mwa yoowo, Munna Neville. Koosuwela wira mwa yoowo, Munna Capps. Koosuwela wira mwa yoowo. Koosuwela wira mwa yoowo. . . .?)  
 . . . mmosa a yaawo.

Oh, mmosa a yaawo, mmosa a yaawo;  
 Kinnitthapa ohimyaka wira, “Ka mmosa a yaawo.”

<sup>214</sup> Oh, khamuntteeliwa murima nyuwo okhala mmosa a yaawo. Akavi yaatthuna okhala mmosa? Nvenxe ntata. Vaareera. Vano kinrowa owiipelani ila:

Vano rwaani munn’aka, mphwanye eparakh’ela

Enrowa orapiha murim’anyu wa etampi,  
 Enrowa opacerya orumiha ittiwi,  
 N’ukhaliha munep’anyu ovihiwaka.

Oh, enooviha vano mmurimani mwaka,  
 Oh, nivuwihawe Nsina Nawe.

Kinnitthapa ohimyaka wira, “Ka mmosa a yaawo.”

Oh, mmosa a yaawo, mmosa a yaawo;  
 Kinnitthapa ohimyaka wira, “Ka mmosa a yaawo.” (Aleluya!)

Mmosa a yaawo, ka mmosa a yaawo,  
 Kinnitthapa ohimyaka wira, “Ka mmosa a yaawo.”

<sup>215</sup> Muupuwele etthu mwali aamuhimenry’awe Petru, “Nyuwo khamuhiyo mmosa a yaawo?” Kinnitthapa, ankhi nyuwo? Moosuwela, Petru aahihimya nihiku na Pentekosite, “Ela t’Ile!” Vano, kweekwe kinnihimyaka, “Vakhala wira *ela* kehiyo Ele, kinnitthapa okhalana *ela*, kiwehereryaka Ele orwa.” Ti yeeyo. Kinnitthapa mwaha w’ela.

Tthiri ka mmosa a yaawo, ka mmosa a yaawo;  
 Kinnitthapa ohimyaka wira, “Ka mmosa a yaawo.”

Oh, mmosa a yaawo, mmosa a yaawo;  
 Kinnitthapa ohimyaka wira, “Ka mmosa a yaawo.”

<sup>216</sup> Oh, kahi yooreerexa, okilaathi vamosa mapuro a Wirimu mwa Kristu Yesu, nipatthanaka ni Eroho, nipatthanaka va

Masu, nilavulaka itthu sooreera sinrwa. Ti yooreera saana. Kinnitthapa osuwela yeeyo, ankhii nyuwo? Khamuntthapa nyuwo okhala muKristu? Nyuwo khamuntthapa itampi sanyu okhala vathi v'Ephome? Owo onimoorwa nihiku nlo, nto ninoorowa ni Yoowo. Vano muupuwele, wuuluvala wothene onoonimora; iretta sothene, oxanka wothene, ekumi yothene enkhwa enoorukunuwa. Oh, wulu! Kinniwerya paahi owuupuwela axinna a khalayi yaari va. Kinnuupuwela... Akavi animuupuwela Rabbi Lawson? Wulu, anci-ene a nyuwo. Kinniwerya omoona othomeiye-ene ekopo awe ele va. Nto miyo kaakilaathiki ottuli iwe. Owo aaniipa nsipo nla naamukhaani... (Minuutu mmosa paahi Teddy, munna.) Kinimwehererya, koone kaaweryaka ophwanya eyiipeliwo aya. Nkinsuwela.

Iwe onnikiwehererya voosiisu w'otthapa,  
Weiwo mikhora sa nluku noowaarya  
sihuliwaaya,  
Nto kalapuwa-ru ekhato ela ya mixankiho,  
Kinoomumula epantte ekina.

Nihiku nlo ovikana vaniphiiy'aya woona  
w'okhwa,  
Nihiku nlo, Muluku paahi t'onsuwela vayi  
wala liini,  
Mattheke a ekumi y'okhwa anoomaala,  
Nto kinoorowa okhala omwaako Siyoni. (Ayo.)

<sup>217</sup> Mattheke ala makhaani anvilikeya mwa hiyo— woona, olawiha, woona ntoko, wunkherya, ni wiiwa, iyoonele iya sikhaani ni mattheke anvilikeya mw'ekumi ila enkhwa, nihiku nlo anoomaala. Vano miyo, yoomi, ni nyuwo, ninoorowa okhala omwaako Siyoni. Oh, okisivela yeeyo, ankhii nyuwo? Osuwela wira nookhalana olipa iwe woohimala. Vaareera. Akavi ansuwela nsipo nahu na khalayi n'opatiiso? Vano, ninoorukunxa nlo. Nrowe nikuxe nsipo nahu n'olaxeryana:

Mukuxe Nsina na Yesu ni nyuwo,  
Anamwane a mixankiho ni ooriipiwa murima;  
Nlo nnimoovahani otthapa ni olipa,  
Mukuxe Nenlo mapuro othene onrow'anyu.

<sup>218</sup> Mukuxe Nsina na Yesu ni nyuwo. Mwiire yeeyo paahi, mwaarowaka. Vaareera, othene vamosa vano. Muhiliyale, iwoora thanu na tthaaru voosiisu ittikitti sa mavekelo sinoorowa okaiwa sa muthukumano. Muthukumano ompacerya iwoora thanu na xexe ni minuutu miloko miraru. Kinrowa olaleya ewoora ya namuloko. Muteko w'ovekeleliwa aretta onrowa opacerya ntoko ewoora ya namuloko n'imosa.

<sup>219</sup> Meelo oxekuwa, meelo makaaripi onrowa okhala mutthaka wa onamalaleya ehapari otapernakulu. Nto meelo ohiyu, nyuwo othene mulampe itampi sanyu ni muhinatoko opatisiwa,



enookhala...etanki enoohuliwa; ninrowa waapatisa atthu ni Nsina n'Apwiya Yesu Kristu.

<sup>220</sup> Atthu othene vamosa vano, niipika voviituperya. Munna Busty, khamunsuwela moota ory'aka ootthapa ni omuxukhuru Muluku. Moosuwela, owo aaroorowa wa meetiku. Nto kileeliwe wira meetiku aaroomuweha, vano khaasuwela tu etthu yo wupuwela. Owo khaamini wira aari muretta yoole. Oh, kehiyo esiiri etthu Muluku enwery'awe wira. Eyo kehiyo ekeekhahi? Vaareera.

Mukuxe Nsina (Muhimye!) na Yesu ni nyuwo,  
Anamwane a mixankiho ni ooriipiwa murima;  
Nlo nnimoovahani otthapa ni olipa,  
Vano, mukuxe mapuro othene onrowaanyu.

Nsina nooreerexa (Nsina nooreerexa!), Oh  
moota ninsivel'aya!  
Muroromelo wa mulaponi ni ohakalala wa  
Wirimu;  
Nsina nooreerexa (Oh, Nsina nooreerexa!), Oh  
moota ninsivel'aya!  
Muroromelo wa mulaponi ni ohakalala wa  
Wirimu.

<sup>221</sup> Vaareera. Kinttikiherya muteko wa pastore vano. Owo onoohimya moolomo kamosa-kamosa, wala onoomuleela mutthu wira anilaxerye, khula etthu eri mmuruni mw'awe.



59-1219 Sookoha ni Sowaakhula mwaha wa Eroho Yowarya  
Branham Tabernacle  
Jeffersonville, Indiana wAmerika

EMAKHUWA

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)